


انالوم باتكا سدقمل



The Holy Bible in the Hassaniyya language of Mauritania:

(Bible) سدقمل انالوم باتكا

المقدس مولانا الكتاب

The Holy Bible in the Hassaniyya language of Mauritania: المقدس مولانا الكتاب (Bible)

copyright © 2024 Pioneer Bible Translators

Language: (Hassaniyya)

Contributor: Pioneer Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 26 Jul 2025 from source files dated 13 May 2025

e6f0c3d8-299e-5aac-95be-a59aa7e65092

Contents

التكوين سفر	1
-----------------------	---

سفر التكوين

بداية العالم

- 1 فالبداية خلق مولانا العالم. وهادي هي الطريقة الي خلقو بيها:
- 2 فالبداية كانت لارض ماهي منتظمة ولا فيها شي، وكانت الظلمة امغطية الماء، وروح مولانا يحوم فوقو.
- 3 وكال مولانا: يخلق النور. واخلق النور.
- 4 وخرص مولانا النور وشاف النور زين. وافصل مولانا النور عن الظلمة.
- 5 وسما مولانا النور انهار، وسما الظلمة ليل. وعاد ليل وعاد امع الصباح. وكان ذاك هو اليوم لأول.
- 6 وكال مولانا: تخلق قبة امبين المياه اياك اتكسم المياه شور قسمين.
- 7 وخلق مولانا قبة وافصل المياه الي تحت القبة عن المياه الي فوقها. واخلق هاذا.
- 8 وسما مولانا القبة السما. وعاد ليل وعاد امع الصباح. وكان ذا اليوم الثاني.
- 9 وكال مولانا: يجتمعو المياه الي تحت السما كاملين فابليدة وحدة اياك تظهر التراب. واخلق ذا.
- 10 وسما مولانا هادي التراب لارض، وسما بل امنين اجتمعو المياه لبحور. وخرص مولانا وشاف ذاك كامل زين.
- 11 وكال مولانا: تعطي لارض النباتات الي فيهم لبذور، ويخلق اصدر رافد الثمار الي فيهم لبذور بكل أنواعهم اعلى لارض. واخلق ذا.
- 12 ووخظت لارض النباتات الي فيهم لبذور بكل أنواعهم، واعطت املي اصدر رافد اثمار فيهم لبذور من نوعهم. وخرص مولانا وشاف ذا كامل زين.
- 13 وعاد ليل وعاد امع الصباح. وكان ذا اليوم الثالث.
- 14 وكال مولانا: يخلقو لأنوار فقبة السما اياك يميزو النهار عن الليل ويعودو علامات يحددو لأيام والسنين ولعياد.
- 15 ويخلقو أنوار فقبة السما اياك يظو اعلى لارض. واخلق ذا.
- 16 وخلق مولانا لأنوار لكبار لأثنين: خلق النور لأول لكبير اياك يعود فانهار، وخلق النور الثاني الصغير اياك يعود فالليل، وخلق مولانا النجوم املي.
- 17 ودار مولانا هادو لأنوار فقبة السما اياك ايظو اعلى لارض،
- 18 واجعلهم مولانا هوما المسؤولين عن انهار وليل وهوما الي يميزو النور من الظلمة. وخرص مولانا وشاف ذا كامل زين.
- 19 وعاد ليل وعاد امع الصباح. وكان ذا اليوم الرابع.
- 20 وعاكب ذا كال مولانا: تمتلا المياه بياسر من المخلوقات الحيين، واتعود فم اطيور اطيور امبين لارض والسما.
- 21 وخلق مولانا وحوش لبحور لكبار، وكيف ما خلق المخلوقات الحيين كاملين الي املان منهم الماء، خلقهم من كل نوع. وخلق املي كل اطيور بريشاتو من كل نوع. وخرص مولانا هاذا وشافو زين.
- 22 ودار مولانا فيهم البركة وكال: اثمرو وانثرو ويمتلاو مياه لبحور بالمخلوقات، ويثكرو اطيور اعلى لارض.
- 23 وعاد ليل وعاد امع الصباح. وكان ذا اليوم الخامس.
- 24 وكال مولانا: تعطي لارض مخلوقات حيين من كل نوع: من حيوان يربا وزواحف وحيوانات نخلا من كل نوع. واخلق ذا.
- 25 وخلق مولانا الحيوانات نخلا من كل نوع، والحيوان الي يربا من كل نوع، وكل حيوان يزحف اعلى التراب من كل نوع. وخرص مولانا وشاف ذا زين.
- 26 وعاكب ذاك كال مولانا: المخلكو لإنسان اعلى شي من صيفاتنا، وسلط مولانا لإنسان اعلى حوت لبحر واطيور السما والحيوان الي يربا وحيوان نخلا اعلى التراب واعلى كل حيوان يزحف اعلى التراب.

- 27 وخلق مولانا لإنسان اعلى شي من صيفاتو، اعلى شي من صيفاتو خلقتهم راجل وامرة.
 28 ودار مولانا فيهم البركة وكال: اثمرو واكثرو وعودو ياسرين وسيطرو اعلى لارض، واتسلطو اعلى حوت لبحر واطيور السما وكل شي يتحرك اعلى لارض.
 29 وكال مولانا: اراني اعطيتكم كل اصدر اعلى وجه لارض رافد ابذور. اعطيتكم كل صدراية رافدة لكم ثمار اياك توكلوهم.
 30 يغير لحيوانات لارض واطيور السما كاملين وكل الحيوانات الصغيرة الي تزحف وكل مخلوق فيه روح، اتعود النباتات اطعامها. واخلق ذا.
 31 ونخص مولانا هاذا وشافوزين حتته. وعاد ليل وعاد امع الصباح. وكان ذا اليوم السات.

2

بداية العالم

اخلاقة العالم- القصة الثانية

- 1 وبهاذي الطريقة اوفاو السماوات ولارض وذا كامل الي فيهم.
 2 وعاكب يلين اوفو مولانا من شغلتنو كامل، استراح فاليوم السابع.
 3 وبارك مولانا اليوم السابع وكال اعلنو مخلصلو، ببلي اوفو فيه من خلق العالم.
 4 هاذي هي قصة السماوات ولارض وقت اخلاقتهم: اليوم الي خلق الله تعالى لارض والسماوات
 5 ما كانت أي اربعة خالقة اعلى لارض، ولا كان املي أي اصدر فات انبت، ببلي الله تعالى مافات فهاذا الوقت مشا اسحاب اعلى لارض، ولا كان فات اخلق أي آر كاج يحرث التراب.
 6 يغير كان يوظف من لارض فهاذا الوقت عين من الما تسكي التراب.
 7 وعاكب ذاك خلق الله تعالى الراجل من التراب وانفخ فاخنافرو الحياة وعاد الراجل نفس حية.
 8 وعاكب ذاك اغرس الله تعالى اصدر فلبليدة زينة فعدن فالشرق وفم عاد عايش الراجل الي خلق.
 9 ونبت الله تعالى من لارض كل نوع من الصدر الزين و صالح للوكيل. وكانت فوسط هاذي لبليدة الزينة صدراية تعطي الحياة وصدراية اخرا تعطي معرفة الصالح والطالح.
 10 وكان فم نهر يمشي فهاذي لبليدة الزينة الي فعدن اياك يسكيها، وكان هاذا النهر يتفرعو منو 4 فروع.
 11 اسم لأول هو فيشون وهو الي يوظف احذا ارض الحويلة كاملة بل امنين فيه الذهب.
 12 والذهب الي فم من نوعية زينة، وفم املي ازين لبحور واحجار العقيق.
 13 واسم الثاني هو جيحون وهو الي يوظف احذا ارض كوش كاملة.
 14 واسم الثالث هو دجلة ويوظف شرق آشور. والرابع اسمو الفرات.
 15 واكبط الله تعالى الراجل ودارو فهاذي لبليدة الزينة الي فعدن اياك يحرثها ويرعاها.
 16 ووصا الله تعالى الراجل وكالو: اتكد توكل الي تبغي من الصدر ذي لبليدة الي فعدن.
 17 يغير ذيك الصدراية الي تعطي المعرفة امين الصالح والطالح، لا توكل منها، ببلي الوقت الي توكل منها لاهي اتموت.
 18 وكال الله تعالى: ماهو زين بيكا الراجل وحدو، ولذاك لاهي المخلوكلو معين اياك يشارك حياتو امعاها.
 19 وخلق الله تعالى من التراب كل حيوان فلحريثة وكل اطيور السما. وعاكب ذاك جابهم كاملين للراجل اياك يشوف شلاهي يسمي كل واحد منهم. وكل مرة يسمي واحد من المخلوقات يعود ذاك اسمو.
 20 وسما الراجل الحيوانات كاملين الي يرباو واطيور السما كاملين وحيوانات لخللا كاملين، يغير ما اجبر امينهم واحد يعاونو ويشاهلو.

- 21 ورّكّ الله تعالى الراجل اركّاد امتين، وفوقت اركّادو، اكبظ الله تعالى ظلعة من اظلوغو وغطا بلها بالجل .
 22 وعاكب ذاك خلّك الله تعالى من الظلعة اللي اكبظها من الراجل امرة وكدمهالو.
 23 وكال الراجل: ظرك ، هادي اعظم من اعظامي ولحمة من لحمي، ولاهي اسميها امرة بيّلي انكبظت من امرئ.
 24 ولذا السبب يخلي الراجل بوه وأمو ويلتصك باعيالو، ويعودو عابلة وحدة.
 25 وكانو الراجل واعيالو كلهم عريان، يغير ما كانوا يستحاو.

3

بداية العالم

الذنب لأول

- 1 وكان الحنش هو أمكر حيوانات لخلا اللي خلّك الله تعالى. وكال للهرة: حكّك كالكّم الله تعالى : لا توكلو من أي صدرية فهادي لبليدة الزينة ؟
 2 وكالت مرة للحنش: ابدي انكّو نوكلو من احدج الصدر كامل اللي فهادي لبليدة،
 3 يغير الصدرية اللي فوسط هادي لبليدة الزينة، كط كالكنا الله تعالى: لا توكلو منها ولا اتمسوها اياك ما اتموتو.
 4 وكال الحنش للهرة: ابدي مانكم لاهي اتموتو.
 5 يغير الله تعالى يعرف اعلنكم الوقت اللي توكلو منها لاهي اتعود عندكم معرفة اجديدة واتعودو كيفت الله تعالى اتميزو امبين الصالح والطالح.
 6 وشافت مرة اعلن الصدرية زينة للويكل وتجذب شورها العين، ومرغوب فيها بسبب اللي تعطي من الحكمة لحد يوكل منها .
 7 وانفتحو عينهم، وفظنو اعلنهم عريانين. وخيطو اوركّ صدرية التين وصنعو لروسهم لباس يغطي عورتهم.
 8 ومن فم سمعو صوت الله تعالى ماشي فهادي لبليدة الزينة وقت مشي الريح، واتروقو الراجل واعيالو من الله تعالى امبين اصدر هادي لبليدة.
 9 وعيط الله تعالى للراجل وكالّو: انتا امنين؟
 10 وكال الراجل: اسمعت صوتك فهادي لبليدة ونخلعت بيّلي آنا عريان، واتروق عنك.
 11 وكالّو الله تعالى: من كالكّ اعلنك عريان؟ اترك كلت من الصدرية اللي انهيتك عن توكل منها؟
 12 وكال الراجل: مرة اللي امعاي ، اعطاني من احدج الصدرية وكلت.
 13 وعند ذاك كالكّ الله تعالى للهرة: ذا اللي عدلتي شنهو؟ وكالتلو مرة: الحنش احتال اعليّ وكلت من احدج ذيك الصدرية.
 14 وكال الله تعالى للحنش: بيكلي انتا عدلت ذاك، اتعود ملعون أكثر من المخلوقات لخرين كاملين. وكل أيام حياتك لاهي تحبي اعلي كركشك، ولاهي توكل التراب،
 15 ولاهي اندير عداوة امبينك وامبين مرة وامبين نسلك ونسلها. لاهي يبعج نسلها راسك واتنا لاهي اتعظو فالعركوب.
 16 وكال الله تعالى للهرة: لاهي انكّو اوجاع حملك. وبالألام لاهي تبراى أولادك، ولاهي تخدمي راجلك، ولاهي يسود اعليك.
 17 وكال الله تعالى للراجل: انتا اسمعت اللي اقترحت اعليك اعمالك وكلت من الصدرية اللي انهيتك عن توكل منها. ولذا لاهي نلعن لارض، ولانك لاهي اتعود توكل منها يكون بالكد والتعب كل أيام حياتك.
 18 ولاهي اتنتلك الشوك وينيتي، ولاهي توكل من اصدر لحرثة .
 19 اتحصل اطعامك باعركّ جبهتك ، يلين ترجع للتراب اللي اوخلّكت منها. من التراب اوخلّكت وشور التراب لاهي ترجع.
 20 وسما آدم اعيالو حواء بيّلي لاهي اتعود أم البشر كاملين.

- 21 واصنع الله تعالى لباس من جل حيوان لآدم واعيالو، ولبسولهم.
- 22 وكال الله تعالى: اراعيه عاد لإنسان كيف واحد منا فالتمييز امبين الصالح والطالح، وظرك عاد يكد يد ايدو ويكبظ من احدج صدراية الحياة ويوكل منها ويعيش إلى الأبد.
- 23 وصاعو الله تعالى من لبليدة الزينة اللي فعدن اياك يحرث التراب اللي اوخلك منها.
- 24 وعاكب يلين صاع لإنسان، دار مولانا فجبهة شرق عدن نوع من الملايكة اسمهم الكرويم اللي كانو رافدين سيف من ناريزكبن اياك يحرس اطريك اللي واعدة صدراية الحياة.

4

بداية العالم

أول مرة يموت آرڤاج

- 1 وعاش آدم اعيالو حواء وحملت منو وخلاتلو اطفيل اسمو قايل وڤالت: ارزقني الله تعالى باطفيل.
- 2 وعاكب ذاك خلات خوه هايل. وكان هايل راعي لغنم، وقايل كان مزارع.
- 3 وعاكب فترة كدم قايل لله تعالى قربان من خيرات لارض.
- 4 وهايل كدم اشبه اللي عندو من اكبر لغنم واسمنها. واپكل الله تعالى قربان هايل،
- 5 يغير قربان قايل ما يكلو. وانفكع قايل حته، وعاد وجهو امعبس.
- 6 وكال الله تعالى لقايل، اعلاش تنفكع؟ اعلاش يعبس وجهك؟
- 7 يلين اتعدل شي صالح نكلو، والين اتعدل شي ما هو صالح لاهي يعود ذنبك اڤريب من بابك ويدور يتحكم فيك، ولا تخليه يتحكم فيك.
- 8 وكال قايل لخوه هايل: وهاي جاي ثمشو شور انخلوات. وفالوقت اللي كانو فيه هوما لأثنين فانخلوات، اهجم قايل اعلى خوه هايل ونگلو.
- 9 وكال الله تعالى لقايل: امنين خوك هايل؟ وڤالو قايل: ما نعرف. آنا اثري حارس لخوي؟
- 10 وكال الله تعالى: شنو اللي عدلت؟ دم خوك يزويكي من التراب.
- 11 من ظرك لارض لعنتك وفتحت فيها لدم خوك اللي اكلتو بايدك.
- 12 يلين تحرث التراب ماهي لاهي تعطيك شي. واتنا لاهي اتعود واقد بلا مسكن.
- 13 وكال قايل لله تعالى: عقابي امتن من انكد نتملوا.
- 14 اتنا اليوم صعنتي من لارض اياك نخنتي من حضرتك وانعود ابلا مسكن فالدنيا، وأي آرڤاج يجبرني يگلني.
- 15 وڤالو الله تعالى: ابدي، اللي يگلك لاهي انعاقبو باسبع مرات عقابك. ودار الله تعالى علامة اعلى قايل اياك ما يگلو حد يجبرو.
- 16 وامشا قايل عن محضر الله تعالى واسكن فارض نود اللي شرق عدن.
- 17 وعاشر قايل اعيالو وحملت وخلاتلو اطفيل اسمو حنوك. وكان قايل وقتها يبني مدينة، وسماها حنوك اعلى اسم ولو.
- 18 وحنوك اجبر إشيرو اسمو عيراد، وعيراد اجبر محويل، ومحويل اجبر متوشيل ومتوشيل اجبر لامك.
- 19 واتعرس لامك امع مرتين: وحدة منهم اسمها عادة ونحرا اسمها صلّة.
- 20 وخلات عادة يابال وهو أول آرڤاج اسكن فلنخيام واسرح لغنم.
- 21 واسم خوه يوبال وهو أول آرڤاج اخبط التيدنييت والنيفارة.
- 22 وصلّة خلات توبال قايل وهو أول آرڤاج اصنع آلات من النحاس والحديد، واختو اسمها نعمة.

- 23 وكال لأمك لاعلياتو عادة وصلّة: يا عادة وصلّة اسمعو اكلامي يا اعليات لأمك، عدلو اللي انكولكم: أنا اكلت راجل اجرحني وشاب اخبطني.
- 24 وبالتالي يلين يعود يخلص لقابيل 7 مرات لاهي يعود يخلص للامك 77 مرة.
- 25 وعاش آدم حواء مرة اخرا وخلاتلو اطفيل وسماتو شيث وكالت: ارزقني مولانا باطفيل اوخر بل هاييل اللي ككلو قابيل.
- 26 واجبر شيث اطفيل وسماه أنوش. وفذاك الوقت ابدوا الناس يعبدو الله تعالى.

5

بداية العالم

سلسلة نسب النبي آدم يلين النبي نوح

- 1 هاذا سجل مواليد آدم: اليوم اللي خلقت مولانا فيه لإنسان، خلقتو اعلى شي من صيفاتو.
- 2 وخلقتهم راجل وامرة وباركهم وسماهم لإنسان.
- 3 والين عاد عند النبي آدم 130 سنة، اجبر ول يشابهو اعلى صيفاتو وسماه شيث.
- 4 وعاش آدم بعد اخلاكة شيث 800 سنة، واجبر فيها أولاد اخرين وامنات.
- 5 وكان آدم عندو 930 يلين اتوفا.
- 6 والين عاد عند شيث 105 سنوات اجبر أنوش.
- 7 وعاش شيث بعد ذاك 807 سنوات، واجبر فيها أولاد اخرين وامنات.
- 8 وكان عند شيث 912 سنة وقت وفاتو.
- 9 والين عاد عند أنوش 90 سنة اجبر قينان.
- 10 وعاش أنوش عاكب ذاك 815 سنة، واجبر فيها أولاد اخرين وامنات.
- 11 وكان عند أنوش 905 سنوات وقت وفاتو.
- 12 والين عاد عند قينان 70 سنة اجبر مهليل.
- 13 وعاش قينان بعد ذاك 840 سنة، واجبر فيها أولاد اخرين وامنات.
- 14 وكان عند قينان 910 سنوات وقت موتو.
- 15 والين عاد عند مهليل 65 سنة اجبر يارد.
- 16 وعاش مهليل عاكب ذاك 830 سنة، واجبر فيها أولاد اخرين وامنات.
- 17 وكان عند مهليل 895 سنة وقت وفاتو.
- 18 والين عاد عند يارد 162 سنة اجبر النبي إدريس.
- 19 وعاش يارد عاكب ذاك 800 سنة، واجبر فيها أولاد اخرين وامنات.
- 20 وكان عند يارد 962 سنة وقت وفاتو.
- 21 والين عاد عند النبي إدريس 65 سنة اجبر متوشالح.
- 22 وعاش النبي إدريس عاكب ذاك 300 سنة. كان متقي فيها مولانا، واجبر فيها أولاد وامنات.
- 23 وكان عند النبي إدريس فهذا الوقت 365 سنة.
- 24 وكان النبي إدريس متقي فيها مولانا. وعاكب ذاك اختفا النبي إدريس بيهي رفعو مولانا شورو.
- 25 والين عاد عند متوشالح 187 سنة اجبر لأمك.
- 26 وعاش متوشالح عاكب ذاك 782 سنة، واجبر فيها أولاد اخرين وامنات.
- 27 وكان عند متوشالح 969 سنة وقت موتو.
- 28 والين عاد عند لأمك 182 سنة اجبر اطفيل،
- 29 وسماه نوح وكال: هاذا الول يخفف عنا تعبنا والمشقات اللي انعانوها فلارض اللي العنبا الله تعالى.

- 30 وعاش لامك بعد اخلافة نوح 595 سنة، واجبر فيها أولاد آخرين وامنات.
 31 وكان عند لامك 777 سنة وقت وفاتو.
 32 والبن عاد عند نوح 500 سنة، اجبر سام وحام ويافث.

6

بداية العالم

الني نوح يستعد للطوفان

- 1 والبن ابدوا البشر يكثرو فلارض وخلقهم امنات،
 2 شافو الملائكة اعلن امنات البشر ازوينات وكپظوهم واتعرو امعاهم كيف ما ابغاو.
 3 وكال الله تعالى: روجي ما بيكا فلإنسان الزمن كامل بيبي هو إنسان فاني ومن ظرك ماهو لاهي يعيش أكثر من 120 سنة.
 4 ومن ذاك الوقت عاد فلارض لجبابرة بيبي الملائكة اتعرو امع امنات البشر وجبرو منهم أولاد. وكانو أولادهم هوما لجبابرة الي معروفين بالحرب من ذاك الزمن.
 5 وعاكب ذاك شاف الله تعالى اعلن شر لإنسان ازاد حته فلارض، واعلن رغبات لإنسان وافكار كلبو كاملين دائماً ماهم امسكمين.
 6 واتكدر الله تعالى حته فكلبو اعلنو خلق لإنسان فلارض.
 7 وكال الله تعالى: لاهي انفرق البشر الي خلقتهم من اعلى لارض، الناس امع الحيوان والمخلوقات الي يزحفو اعلى اكروشتهم والطيور السما بيبي اتدمت اعلي خلقتهم.
 8 يغير النبي نوح ارضا اعليه الله تعالى.
 9 وهادي هي قصة النبي نوح: هو كان آرکاج صالح ومتقي مولانا من امين أهل جيلو، ويعدل كل شي طلبو منو مولانا.
 10 واجبر اثلث أولاد هوما سام وحام ويافث.
 11 عادت لارض فاسدة عند مولانا وعاد فيها الظلم وشر لإنسان.
 12 والبن شاف مولانا هاذا الفساد الي خسر حياة كل البشر،
 13 كمال مولانا للنبي نوح: جات نهاية هاذا الزمن، ولاهي انفرق البشر كاملين من الوجود بيبي بسببهم امتلات لارض من الظلم. لاهي انيدهم وانيد لارض امعاهم.
 14 وعدل لراصك سفينة من لعمد لمتان، وابني فيها ابوت وادهنها بالطين من الكدام ومن النهر اياك الما ما يدخل فيها.
 15 وتبينها بهادي الطريقة: طول السفينة يعود 150 ميتر، وعرضها يعود 25 ميتر، وطولها اعلى الفولك يعود 15 ميتر.
 16 واتعدل فيها مغطاية يعود امبينها امع السفينة 50 سانتيمتر، واتعدل فيها باب، واتعدل فيها ثلاثة طوابق، التحتاني والوسطاني والفوقاني.
 17 بيبي راعيني لاهي اتمشي طوفان اعلى لارض اياك انفرق كل مخلوق حي تحت السما. وكل شي اعلى لارض لاهي يهلك.
 18 يغير لاهي انعدل عهدي امعك وتدخل السفينة اتتا وأولادك واعمالك واعليات أولادك امعك.
 19 وتكبظ امعك فالسفينة 2 من كل مخلوق اذكر ونيثي اياك يسلكو امعك:
 20 اثنين من كل نوع من الطيور ومن كل نوع من الحيوانات ومن كل نوع الحيوانات الي يزحفو اعلى اكروشتهم اياك يحياو.
 21 واكبظ امعك كل شي ينتكل واتخزنو اياك يعودهم ويعودك الطعام.
 22 وعدل النبي نوح كل شي اطلب مولانا منو.

7

بداية العالم

مولانا يوسلڤ النبي نوح وعائلته من الطوفان

- 1 ومن فم كمال الله تعالى للنبي نوح: ادخل فالسفينة اتنا وكل أسرتك، بيلي اجبرتك وحدك صالح فهاذا الجيل.
- 2 واكبط امعاك من كل نوع من الحيوانات لخلال اسبع اذكور واسبع ناٲي، والحيوانات الي ماهم احلال تكبظ من كل نوع أشين من الذكور وأثنين من الناٲي.
- 3 واملي تكبظ من كل نوع من الطيور اسبع اذكور واسبع ناٲي اياك بيكا جنسهم اعلى لارض.
- 4 بيٲي عاكب اسبعة أيام لاهي انمٲي اسحاب اعلى لارض، ولاهي اتم ماشة مدة 40 يوم فليل وانهار، اياك انفرق كل مخلوق حي كبط خلكتو من اعلى لارض.
- 5 وعدل النبي نوح كل شي اطلب منو الله تعالى.
- 6 وكان النبي نوح فهاذا الوقت عندو 600 سنة وقت امجي طوفان اعلى لارض.
- 7 وادخل النبي نوح فالسفينة هو وأولادو واعيالو واعليات أولادو اياك يسلكو من ما الطوفان.
- 8 ودخلو املي الحيوانات لخلال والحيوانات الي ماهم احلال والطيور والحيوانات الي يزحفو اعلى اكروشتهم.
- 9 وجاو للنبي نوح ودخلو فالسفينة اعلى شكل أزواج اذكر ونٲي كيف ما اطلب مولانا من النبي نوح.
- 10 وعاكب اسبعة أيام جا الطوفان اعلى لارض.
- 11 فسنة 600 من حياة نوح فالشهر الثاني فاليوم 17 من الشهر، انفجرت المياه الي كانت عميقة فالتراب وانفتحو ابواب السما.
- 12 ونزلت اسحاب اعلى لارض فليل وانهار مدة 40 يوم.
- 13 وفذاك اليوم نفسو ادخل النبي نوح فالسفينة هو وأولادو، سام وحام ويافث واعيال نوح واعليات أولادو الثلاثة.
- 14 وكان امعاهم من كل نوع من حيوانات نخلا والحيوانات الي يربأو والحيوانات الي يزحفو اعلى اكروشتهم والطيور.
- 15 من كل المخلوقات الحين جاو للنبي نوح ودخلو فالسفينة اعلى شكل أزواج
- 16 اذكر ونٲي من كل مخلوق كيف ما اطلب مولانا من النبي نوح. وعاكب ذاك اكفل الله تعالى باب السفينة.
- 17 وواصل الطوفان مشبه اعلى لارض مدة 40 يوم، وركب ما الطوفان السفينة فوك لارض.
- 18 وكانت المياه الياسرة اتواصل مشيها اعلى لارض والسفينة ماشة فوك الماء.
- 19 وانزادت المياه حته يلين غطت لكدا لكبار كاملين الي تحت السما.
- 20 وواصلت المياه مشيها يلين الحك طولها اعلى الفوك اسبع امطار فوك لكدا لكبار.
- 21 وماتو كل المخلوقات الحين الي كانو موجودين اعلى لارض من الطيور وحيوانات نخلا والحيوانات الي يربأو والزواحف والبشر.
- 22 ومات كل مخلوق حي يتنفس اعلى لارض.
- 23 وفرق مولانا من اعلى سطح لارض كل مخلوق اسوا من البشر والحيوانات والزواحف واطيور السما، كاملين فرقو من لارض ولا ابكا ماهو نوح والي امعاه فالسفينة.
- 24 وابكات المياه موجودة اعلى لارض مدة 150 يوم.

8

بداية العالم

القران الي كدم النبي نوح عاكب يلين وكيف الطوفان

- 1 ولا انسا مولانا النبي نوح وكل حيوانات نخلا والحيوانات الي يربأو الي امعاه فالسفينة، ومشا الريح اعلى لارض وبدات لارض اتمص الماء.
- 2 وكانت عين الماء لكبيرة الي عميقة فالتراب انكفلت وابواب السما انكفلو، ووكفت اسحاب الحاية من السما.

- 3 وارتفعت المياه عن لارض اشوي اشوي. وعاكب 150 يوم،
 4 فاليوم 17 من الشهر السابع، وكفت السفينة اعلى اكدا اراراط.
 5 وظلت المياه تنتكص يلين الشهر العاشر. وفاليوم لأول من الشهر العاشر ظهور روس لكدا.
 6 وعاكب 40 يوم افتح النبي نوح الكوة الي عدل فالسفينة.
 7 ومشا اغراب واتم طير فوق لارض يلين بدات المياه تيبس عن لارض.
 8 وعاكب ذاك مشا النبي نوح احمامة اياك يشوف إلى عادت المياه ييبس عن لارض.
 9 ولا اجبرت حمامة ابليدة تنزل فيها يبيل المياه مزالت امغطية لارض كاملة. ورجعت حمامة شور النبي نوح فالسفينة. ومد ايدو واحكمها ودخلها شورو فالسفينة.
 10 وحانا اسبعة أيام اخرين ومشا حمامة من السفينة مرة اخرا.
 11 ورجعت شورو امع اغروب الشمس رافدة نخشمها وركة من صدراية الزيتون اجديدة. وافهم النبي نوح اعلن المياه مصتها لارض.
 12 وحانا اسبعة أيام اخرين وبعدين مشا حمامة ولا رجعتلها هادي المرة.
 13 وفاليوم لأول من الشهر لأول من سنة 601 من حياة النبي نوح، فهذا الوقت كانت المياه بدات تيبس عن لارض. وارفع النبي نوح مغطية السفينة وشاف اعلن لارض تيبس حته.
 14 وفاليوم 27 من الشهر الثاني ييبس لارض تماما.
 15 وكلم مولانا النبي نوح وكالو:
 16 اوخط من السفينة اتنا واعمالك وأولادك واعليات أولادك.
 17 ووظ كل نوع من المخلوقات الحيين الي امعاك، من الطيور والحوانات والزواحف اياك يتوالدو فلارض ويكثرو.
 18 ووظ النبي نوح وأولادو واعيالو واعليات أولادو
 19 والحوانات والزواحف والطيور والمخلوقات الي يتحركو اعلى لارض خاظو كاملين من السفينة بأنواعهم.
 20 وابنا النبي نوح مذبج لله تعالى واكبط واحد من كل الحيوانات للال والطيور للال واذبحهم وكدمهم لله تعالى كيفت قربان محروك اعلى المذبج.
 21 واكبلهم الله تعالى وارضا وكال الله تعالى امينو امع راصو: ماني لاهي نلغن لارض مرة اخرا بسبب لإنسان امع اعلن ميول كلبو شرير من صغرو. ولاني لاهي نكل كل مخلوق حي مرة اخرا كيف ما عدلت.
 22 ومادامت لارض موجودة لاهي يعودو فيها مواسم لحرثة والحصاد، البرد والحمان والصيف والشتا والنهار والليل. ولاهي يتم هذا هو حالها إلى الأبد.

9

بداية العالم

بداية العهد امين مولانا والبشر عاكب الطوفان

- 1 وبارك مولانا النبي نوح وأولادو وكالهم: اثمرو واكثرو واملاو لارض.
 2 حيوانات نللا الي فلارض واطيور السما والزواحف وحت لبحر كاملين لاهي يخافو منكم ويرهبوكم، يبيل مولانا اعطاكم السلطة اعليهم.
 3 وكيف ما اعطيتكم الصدر نلخر كيفت اطعام لكم، ظرك عاطيكم الحيوانات.
 4 يغير لا توكلو أي لحم مزال الدم فيه يبيل الدم هو الي يمثل الحياة.
 5 يغير دمكم اتوما لاهي انعاقب اعليه كل حيوان سفكو، واملي كل إنسان لاهي نكلو اعلى حياة خوه لإنسان يبيل هو كيفتو.
 6 ومن يسفك الدم لإنسان لاهي ينسفك دمو، يبيل مولانا خلط لإنسان اعلى شي من صيفاتو.

- 7 يغير اتنوما اثمرو واكثارو فلارض.
- 8 وكلم مولانا النبي نوح وامعاه اولادو وكالو:
- 9 انا ظرك لاهي انعدل عهدي امعاكم وامع نسلكم اللي جاي اوراكم.
- 10 وامع كل مخلوق حي امعاكم من الطيور والحيوانات اللي يرباو وكل حيوانات لخلا، وكل اللي خاظ من السفينة وكل مخلوق حي اعلى لارض.
- 11 ولاهي انعدل عهدي امعاكم ولا تبت لاهي نسمح باعلن اتفرق مياه الطوفان كل مخلوق حي مرة اخرا، ولا تبت لاهي نسمح باعلن الطوفان يجي ويخسر لارض مرة اخرا.
- 12 وكال مولانا: هاذي هي علامة العهد اللي لاهي انعدل بيني وبينكم وكل مخلوق حي امعاكم فكل لاجيال،
- 13 لاهي اندير خط الندية فالسما ويعود علامة العهد امبيني وامبين لارض.
- 14 والين اتمشي السحاب فولك لارض ويظهر خط الندية فالسما،
- 15 تتذكر العهد اللي امبيني وبينكم وامع كل نوع من مخلوق حي، ولا تتحول المياه شور طوفان يهلك كل مخلوق حي.
- 16 والين يظهر خط الندية فالسما لاهي انشوفو وتتذكر العهد اللي لاهي يدوم إلى الأبد امبيني وامبين المخلوقات الحية كاملين اللي اعلى لارض.
- 17 وكال مولانا للنبي نوح: هاذي هي علامة العهد اللي عدلتو امع كل مخلوق حي اعلى لارض.
- 18 هاذو هوما اولاد نوح اللي خاظو من السفينة: سام وحام ويافت. وحام هو بو كنعان.
- 19 هوما اولاد النبي نوح الثلاثة ونسلهم هو اللي انتشر فكل جهات لارض.
- 20 واشتغل النبي نوح فلحريثة واحرث اصدر العنب اللي يعدل منو عصير العنب.
- 21 واشرب من عصير العنب واسكر واتعرا فخيمتو.
- 22 وشاف حام بو كنعان عورة بوه وامشا وعلم اخوتو.
- 23 واكبطو سام ويافت حولي وداروه اعلى اكافهم ودخلو شور بوهم النبي نوح فانخيمتو، وهوما كانوا ماشين اعلى لورا وسترو عورة بوهم. وكانو وجوهتهم صادين اعلى الجبهة لخرا اياك ما يشوفو عورة بوهم.
- 24 والين اوعا النبي نوح من سكره واعرف اللي عدلو ولو الصغير،
- 25 كال: ملعون كنعان ولاهي يعود احقر من اعبيد اخوتو.
- 26 وكال املي: يا ربي والهي بارك سام واجعل كنعان عبد لو.
- 27 ووسع حدود يافت، ويسكن فاخيام سام ويعود كنعان عبد لو.
- 28 وعاش النبي نوح عاكب الطوفان 350 سنة.
- 29 والين اتوفا النبي نوح كان عندو 950 سنة.

10

بداية العالم

أمم العالم

- 1 هاذي لاحة بسجل اولاد سام وحام ويافت اولاد النبي نوح، اللي خلجكولهم عاكب الطوفان.
- 2 اولاد يافت هوما جومر وماجوج وماداي وياوان وتوبال وماشك وتيراس.
- 3 وأولاد جومر هوما أشكاز وريفات وتوجرمة.
- 4 وأولاد ياوان هوما ألبشة وترشيش وكتيم ورودانيم.
- 5 ومنهم اتفرعو الناس من قريات اللي اعلى حاشية لبحر اعلى حسب قبائلهم وشعوبهم ولغاتهم.

- 6 وأولاد حام هوما كوش ومصرايم وفوط وكنعان.
- 7 وأولاد كوش هوما سبا وحويلة وسبته ورعمة وسبتكا. وأولاد رعمة هوما شبا وددان.
- 8 وكوش اجبر ول اسمو نمروذ اللي عاد محارب امتين فلارض.
- 9 وكان صياد مانع بفضل الله تعالى. ولذا السبب يكول المثل: كيفت نمروذ هو صياد امتين بفضل الله تعالى.
- 10 وتكونت مملكتو فلأول من مدن بابل وأرك وأكد وكلنة فارض شنعار.
- 11 وعاكب ذاك هاجر شور أشور وابنا مدن نينوى ورحوبوت عبر وكالح
- 12 ورسن اللي هي مدينة اكبيرة امبين نينوى وكالح.
- 13 ومصرايم اجبر قبائل لود وعنام ولهاب ونفتوح
- 14 وقتروس وكفتور وكسلوح، ومن كسلوح جاو الفلشطييمين.
- 15 وكنعان اجبر اطفيل اسمو صيدون وهو بكرو وبعدين اجبر حثا،
- 16 وكنعان هو املي بو اليبوسيين ولأموريين والجرجاشيين
- 17 والحويين والعرقيين والسنيين
- 18 ولأرواديين والصماريين والحمانيين. وعاكب ذاك اتفرعو انخاظ قبائل الكنعانيين.
- 19 وامتدو حدود كنعان من صيدون يلين غزة واخظين من جرار، واورا ذاك شور لاشع واخظين من سدوم وعمورة وأدمة وصبويم.
- 20 وهاذو كاملين هوما أولاد حام اعلى حسب قبائلهم ولغاتهم وشعوبهم وبلدانهم.
- 21 وسام هو خو يافت لكبير وهو املي اجبر أولاد وهو جد أولاد عابر كاملين.
- 22 أولاد سام هوما عيلام وأشور وأرفكشاد ولود وأرام.
- 23 وأولاد آرام هوما عوص وحول وجاثر وماش.
- 24 وأرفكشاد اجبر شالح وشالح اجبر عابر.
- 25 وعابر اجبر اطفلين لأول منهم اسمو فالق وهو اللي فأيامو انكسمت لارض. واسم خوه الثاني هو يقطان.
- 26 ويقطان اجبر أولاد هوما الموداد وشالف وحضرموت ويارح
- 27 وهدورام وأوزال ودقلة
- 28 وعوبال وأبجاييل وشبا
- 29 وأوفير وحويلة ويوباب. وهاذو كاملين هوما أولاد يقطان.
- 30 وكانو ساكنين فاراضي لكدا اللي فالشرق اللي امبين ميشع وسفار.
- 31 وهاذو كاملين هوما أولاد سام حسب قبائلهم ولغاتهم وبلدانهم وشعوبهم.
- 32 وهاذو هوما قبائل أولاد النبي نوح حسب انسابهم وشعوبهم ومنهم اتفركو الشعوب فلارض عاكب الطوفان.

11

بداية العالم

اخلاقة لغات العالم

سلسلة نسب النبي نوح يلين النبي أبرام

- 1 وكانت الناس كاملة اللي فلارض تتكلم بلغة وحدة ويستخدمو كلمات يعرفوهم كاملين.
- 2 واخلاق اعلن يلين رحلت الناس شور الشرق جبرو واد فارض شنعار واتسعو فيه.
- 3 وكالو امبيناتهم: وهاو نكبظو الطوب ونشووه بالنار. واستخدمو الطوب بل لحجار ونوع من الطين لمتين بل الطين العادي.
- 4 وكالو: وهاو بنو لروصنا مدينة وبرج يوصل طولو للسما ونعطو لروصنا هوية اياك ما تتفركو فكل جيها لارض.

- 5 وانزل الله تعالى اياك يشوف لمدينة والبرج اللي كانوا الناس يبنيهم.
- 6 وكال الله تعالى: يلين عادو وهو ما شعب واحد ويتكلمو بلغة وحدة، بداو يعدلو هاذا، ماهو لاهي يصعب اعليهم يعدلو أي شي اوخر ينواو يعدلوه.
- 7 نزلو اصا وانخلطو لغتهم اياك كلهم ما يفهم لغة لوخر.
- 8 وشتتهم الله تعالى من فم فلارض كاملة ووكفوه عن بناء لمدينة.
- 9 ولذا السبب أسمات لمدينة بابل اللي معناها الله تعالى خلط لغة العالم كامل. ومن فم شتتهم الله تعالى فكل جيات لارض.
- 10 وهاذي لاحة سبجل أولاد سام: يلين عاد سام عندو 100 سنة اجبر أرفكشاد عاكب الطوفان بستتين.
- 11 وعاش سام عاكب ذاك 500 سنة واجبر فيها أولاد اخرين وامنات.
- 12 والين عاد عندو أرفكشاد 35 سنة اجبر شالح.
- 13 وعاش أرفكشاد عاكب ذاك 403 سنوات اجبر فيها أولاد اخرين وامنات.
- 14 والين عاد عندو شالح 30 سنة اجبر عابر.
- 15 وعاش شالح عاكب ذاك 403 سنوات اجبر فيها أولاد اخرين وامنات.
- 16 والين عاد عندو عابر 34 سنة اجبر فالق.
- 17 وعاش عابر عاكب ذاك 430 سنة اجبر فيها أولاد اخرين وامنات.
- 18 والين عاد عندو فالق 30 سنة اجبر رعو.
- 19 وعاش فالق عاكب ذاك 209 سنوات اجبر فيهم أولاد اخرين وامنات.
- 20 والين عاد عندو رعو 32 سنة اجبر سروج.
- 21 وعاش رعو عاكب ذاك 207 سنوات اجبر فيها أولاد اخرين وامنات.
- 22 والين عاد عندو سروج 30 سنة اجبر ناحور.
- 23 وعاش سروج عاكب ذاك 200 سنة اجبر فيها أولاد اخرين وامنات.
- 24 والين عاد عندو ناحور 29 سنة اجبر تارح.
- 25 وعاش ناحور عاكب ذاك 119 سنة اجبر فيها أولاد اخرين وامنات.
- 26 والين عاد عندو تارح 70 سنة اجبر أبرام وناحور وهاران.
- 27 وهاذا سبجل أولاد تارح: تارح اجبر أبرام وناحور وهاران، وهاران اجبر لوط.
- 28 ومات هاران سابك بوه تارح فلارض اللي اخلك فيها شور أور الكلدانيين.
- 29 واتعرس كل من أبرام وناحور وكان اسم اعيال أبرام ساراي واسم اعيال ناحور ملكة منت هاران اللي اجبر ملكة ويسكة.
- 30 وكانت ساراي عاكر ما اتخلي التركة.
- 31 واكيط تارح ولو أبرام وول لوط ول هاران وساراي اعيال ولو أبرام وامشاو فابلد من أور الكلدانيين واعدين ارض كنعان. يغير يلين لحككو حاران سكنو فم.
- 32 ومات تارح فخاران يلين كان عندو 205 سنوات.

12

بركة أبرام

مولانا يميشي بأبرام شور ارض كنعان

مولانا يسلك أبرام من الجوع ومن المصريين

1 وكال الله تعالى لأبرام: امشي من ارضك وقبيلتك ودار أهلك، وكيس لارض اللي لاهي انتلك.

- 2 ولاهي انعدل منك شعب عظيم، ولاهي انباركك، ولاهي انكبر اسمك، واتعود بركة لناس كاملة.
- 3 والي يباركك يعود امبارك، والي يلعنك يعود ملعون. ولاهي تبارك القبائل كاملين اللي فلارض بسببك.
- 4 وڤام أبرام وعدل ذا اللي ڤالو الله تعالى. وامشات امعاه ساراي اعيالو ولوط ول خوه من حاران. وفذا الوقت كان عندو أبرام 75 سنة.
- 5 وڤبطو امعاهم ادبشهم واعبيدهم اللي كانوا فخاران، وامشاو واعدين ارض كنعان. والين وصلو ارض كنعان،
- 6 عاد أبرام يمشي من ابليدة شور ابليدة يجول فكنعان يلين اوصل لبليدة اللي فيها صدراية اكبيرة اسمها موري اللي خارج مدينة شكيم اللي ساكنين فيها الكنعانيين فذاك الوقت.
- 7 واظهر الله تعالى لأبرام، وڤالو: لاهي نعطي هاذي لارض لنسلك. وڤام أبرام وابنا فم مذبح، ويڤكدم فيه اذبايح لله تعالى اللي اظهرلو.
- 8 وعاكب ذاك امشا من هاذي لبليدة واعد كدية فجبهة الشرق من لبليدة اللي اظهرلو الله تعالى فيها. وابنا خيمتو امبين بيت ايل اللي فالغرب ومدينة عاي اللي فالشرق. وابنا فم مذبح لله تعالى وصلبى فيه.
- 9 ومن فم ڤيم ماشي واعد النقب اللي فالجنوب.
- 10 والين خلڤت جفاف فارض كنعان، ڤام أبرام وامشا واعد مصر يسكن فيها شي من الوقت بيخلي الجفاف كانت امتينة فلارض.
- 11 والين ڤكرب من مصر ڤال لساراي اعيالو: آنا نعرف اعلتك امرة زينة،
- 12 والين يشوفوك المصريين لاهي يڤولو عنك اعيالي، ويڤگوني، ويمشوبك امعاهم.
- 13 ڤوليلهم اصا عنك اختي ونسلكو من المشاكل ونجبرو العافية بسببك انتي.
- 14 والين ادخل أبرام مصر شافو أهل مصر اعلن اعيالو امرة زينة.
- 15 وشافوها املي عمال فرعون وخبرو فرعون بجمالها، وامشاو بيها شور قصره.
- 16 ولا ابخل شي من شي متعدل لأبرام بسبب ساراي، واعطاه لغنم ولبيكر ولحمير ولعبيد ولخدم والبل.
- 17 يغير ما ابطا فرعون يلين ابلاه الله تعالى هو وأهلوه بامراض خطيرة بسبب اعلنو اكبظ ساراي زوجة أبرام وحاول يتعرض امعاه.
- 18 وڤام فرعون ومشا لأبرام يڤيه وڤالو: اتنا ذا اللي عدلتلي شنهو؟ اعلاش ما اتڤولي اعلنها اعيالك؟
- 19 اعلاش اتڤولي اعلنها خنتك اياك نڤبظها وننخيم امعاه؟ ظرك اصا اسمع، اكبظ اعيالك وامرلڤ بيها.
- 20 وڤام فرعون ووصا اعليه اروا ڤيڤج يصيفطوه هو واعيالو وكل أملاكو.

13

بركة أبرام

أبرام يعطي لأول خوه ارض زينة

- 1 وامشا أبرام من مصر وامعاه ساراي ولوط وكل أملاكو شور النقب فكنعان.
- 2 وكان أبرام عندو ياسر من الحيوان والفضة والذهب.
- 3 وامشا من النقب شور بيت ايل إلى لبليدة اللي كبط ابنا فيها خيمتو فلول، اللي امبين بيت ايل وعاي.
- 4 وهاذي هي لبليدة اللي فيها مذبح مولانا اللي كبط ابنا. وفم صلى لله تعالى.
- 5 وكان املي لوط اللي امشا مع أبرام عندو لغنم ولبيكر ونليام.
- 6 وامتلات لارض من أملاكهم يلين ما اتلا فم بل امنين يعيشو فيه فبلد.

- 7 وخلصت اخضومة امبين رعيان أبرام ورعيان لوط فالوقت اللي كانوا يعيشو فيه الكنعانيين والفرزيين فلارض.
- 8 وكمال أبرام للوط : ما يالتنا نتخاصمو امبيناتنا، ولا يالتهم يتخاصمو رعياننا بيبي لنا خوت،
- 9 ولا لارض واسعة كدامك. خلينا تتفاصلو. وإين تمشي اعلى زرك العربي، ثمشي اعلى زري العسري. وإين تمشي اعلى زرك العسري، ثمشي أنا شور زري العربي.
- 10 واتلفت لوط اعلى زرو وشاف واد الأردن كامل يلين صوغر. وكانت لارض املانة من لخطار وكيفت جنة الله تعالى، وتشابه لارض مصر. وهاذا كان سابك يهلك الله تعالى سدوم وعمورة.
- 11 واختار لوط لراضو واد الأردن كامل، وامشا شور الشرق. واتفرك كلهم عن صاحبو.
- 12 واسكن أبرام فارض كنعان، واسكن لوط فابلد لخطار، وابنا اخيامو اكريب من سدوم.
- 13 وكانو أهل سدوم اشرار وعاصين حته لله تعالى.
- 14 وكمال الله تعالى لأبرام عاكب ما امشا عنو لوط: ركب عينيك واتلفت من حولك من لبليدة اللي اتنا فيها، الشمال والجنوب والشرق والغرب،
- 15 بيبي هاذي لارض اللي اتنا شايف لاهي نعطيالك ولنسلك إلى الابد.
- 16 ولاهي انعدل نسلك كيفت احصي التراب، إلى عاد آرا كاج يكد يحسب احصي التراب يتمكن من عد ذريتك .
- 17 كجوم وامشي فطول لارض وعرضها بيبي اعطيتهاك.
- 18 وكام أبرام وارفا اخيامو وابناها احذا اصدر ممرا اللي احذا حبرون. وابنا مذبح لله تعالى فم.

14

بركة أبرام

أبرام يسلك شعوب

- 1 وفذاك الوقت اخلك اعن أمرافل ملك بابل وأريوك ملك الألسار وكدرلعومر ملك عيلام وتدعال ملك جويم
- 2 ادايكو امع بارع ملك سدوم وبرشاع ملك عمورة وشناب ملك أدمة وشمثير ملك صبويم وملك بالع اللي هي صوغر.
- 3 كلهم اجمع اللي عندو من لجنود فواد السديم اللي ينكالو لبحر الميت.
- 4 واللي كانوا عبيد لكدرلعومر مدة 12 سنة، يغير امبلكو واتكبرو اعليه فالسنة 13 .
- 5 وفالسنة 14 امشا كدرلعومر وأصحابو من الملوك، وغلبو الرفائيين فلبليدة ينكالها عشتروت قرنائم. وغلبو الزوزيين فلبليدة ينكالها هام. وغلبو الإييمين فبطحة قريتايم.
- 6 وغلبو الحوريين احذا كدية سعير يلين بيت فاران اللي ماهو ابعيد من الخلوات.
- 7 ومن فم رجعو واعدين مدينة قادش، وغلبو كل لارض اللي كانوا فيها قبيلة العماليق. وغلبو املي الأموريين اللي كانوا ساكنين فارض حرازون تامار.
- 8 وعاكب ذاك كجوم كل من ملك سدوم وملك عمورة وملك أدمة وملك صبويم وملك بالع،
- 9 وادايكو امع كدرلعومر ملك عيلام وتدعال ملك جويم وأمرافل ملك بابل وأريوك ملك الألسار فواد السديم. وكانو أربع ملوك ضد خمسة.
- 10 وكان واد السديم املان من ظايات الطين. وكل من ملك سدوم وملك عمورة حاولو يهربو امع رجالتهم من الحرب يغير وحلو فالطين واللي اسلك منهم اهرب شور الكدية.
- 11 وكامو الملوك لخرين الربعة الباكين اللي غلبو فالحرب وكبظو كل شي كان فسدوم وعمورة من أملاك واطعام وامشاو.
- 12 وكردو لوط ول خو أبرام اللي كان ساكن فسدوم فهاذا الوقت، وكبظو كل شي كان عندو.

- 13 واسلك آراكاج من أهل سدوم وعمورة، وجا لأبرام العبراني ورد اعليه ذا الي اخلك. وكان أبرام ساكن احذا صدراية اكبيرة الي فاتراب ممرا، الي من الأموريين، وهو خو أشكول وعانر، وكلهم أصحاب لأبرام.
- 14 وإلين اسمع أبرام باعلن ول خوه نجبس، كأم واكپظ كل رجالتو الي اخلاكة وكابرين عندو، والي كان عددھم 318 آراكاج، وامشا دافع اورا الملوك الربعة يلين لحك مدينة دان.
- 15 وإلين عاد ليل، كأم أبرام وكسّم رجالتو اعلى فرق، واهجم اعليهم، واغلبهم، وامشا دافع اوراهم يلين لحكو ابليدة اسمها حوبه الي هي شمال دمشق.
- 16 واكپظ الي كانتو يملكو، وجاب لوط ول خوه وأملاكو ولعليات ولحايبس لخرين.
- 17 وارجع إبراهيم بعدما اغلب الملك كدرلعومر والملوك لخرين الي كانتو امعاہ. وخاظ ملك سدوم اياك يستقبلو فواد شوى الي اسمو واد الملك.
- 18 وكان ملكيصادق ملك سالم امع ملك سدوم . واعطا ملكيصادق لأبرام شي من امبورو وشي من عصير العنب. وكان راجل من رجالة مولانا العظيم.
- 19 وبارك أبرام وكآلو:
اعليك بركة مولانا العظيم
الي خلك السما والتراب،
20 والحمد لمولانا العظيم
الي نصرک اعلى أعدائك.
- واعطاه أبرام العشر من كل شي كان عندو.
- 21 وعاكب ذاك كآل ملك سدوم لأبرام: لاهي نكبظ الرواكيچ وانتا تكبظ الباكي.
- 22 وكآلو أبرام: احلفت اعلى الله تعالى الي خلك السما والتراب،
- 23 اعلي ما نكبظ أي شي من ذا الي عندك اياك ما اتكول اعلي اجبرت اخير من عندك.
- 24 ولاني لاهي نكبظ من عندك ماھو الي كالو رجالي. يغير اصا الرجالة الي امشاوامعاي فالحرب والي هوما عانر وأشكول وممرا، خليم يجبرو بكرعتهم.

15

بركة أبرام

مولانا يعطي لأبرام علامة اعلى اخلاكة الي لاهي يورثو

- 1 وعاكب يلين خلكت هاذي لمور، كآل الله تعالى لأبرام فحلم: لا تخاف من شي. أنا نحميك وأجرك اكبير عندي.
- 2 وكآل أبرام: يا مولانا يا ربي شهي اصا فائدة الخير الي تعطيني. أنا ما نجبر لولاد، والي لاهي يورثني هو أليعازر الي من دمشق.
- 3 وكآل املي أبرام: انتا ما اعطيني لولاد وذا هو لعبد الي اخلاكة عندي لاهي يورثني.
- 4 وكآلو الله تعالى: ذا لعبد ماھو لاهي يورثك. الي لاهي يورثك لاهي يوظف من صلبك.
- 5 ووظف الله تعالى أبرام شور كدام خيمتو وكآلو: حرص السما واعد النجوم إلى كديت. وكآلو الله تعالى: كد عدد النجوم لاهي يعود كد نسلك.
- 6 وصدق أبرام الله تعالى واعتبر الله تعالى أبرام إنسان صالح.
- 7 وكآلو: أنا هو الله تعالى الي جابك من أور الكلدانيين اياك انورثك هاذي لارض .

- 8 وكمال أبرام لله تعالى: ابيسمحالة لاهي نعرف اعلي لاهي نورثها؟
 9 وكمالو الله تعالى: اكيظلي عجلة وعنز وكبش اعمر كل منهم 3 سنوات. وكيظلي املي احامتين.
 10 وكيظهم أبرام وشكهم من الوسط اعلي نصين واجعل كل نص امكابل النص لوخر، والطيور ما كسهمهم.
 11 والين كامت الطيور نخلة تنزل وتوكل من الجيفة، صاعهم أبرام.
 12 والين الحلك لمغرب، اركد أبرام اركد امتين، وفذا جات اعليه ظلمة امتينة ونخلع.
 13 وكمالو الله تعالى: عود متيقن اعلن نسلك لاهي يتغرب فارض ماهي لهم ، ولاهي يستعدوهم أهلها ويحكروهم مدة 400 سنة.
 14 يغير لاهي النخلص لهم من ذلك الشعب الي أستعبدهم، وعاكب ذلك لاهي يوخظو بياسر من لأملك.
 15 واننا لاهي اموت فالعافية وتندفن بشيبة صالحة.
 16 وهو ما لاهي يرجعو هون عاكب أربع اجيال . بيبي اثم الأموريين الي ساكنين هون ما فات عادت ياسرة اياك يعاقبهم الله تعالى اعليها .
 17 والين غربت الشمس وجات الظلمة، اظهر اعمود من الدخان واشهاب من النار واخظين امبين طشات اللحم.
 18 وفذاك اليوم عدل الله تعالى عهد امع أبرام وكمالو: لاهي نعطي هاذي لارض لنسلك من نهر مصر إلى نهر لكبير، نهر الفرات،
 19 ابلاد القينيين والقنزيين والقدمونيين
 20 والحيثيين والفرزيين والرقاتيين
 21 ولأموريين والكنعانيين والجرجاشيين واليبوسيين.

16

بركة أبرام

اعيال أبرام اتلود للورث من خلال هاجر

اخلافة إسماعيل لأبرام

- 1 وساراي اعيال أبرام كانت امرة عاكر. وكانت عندها خادم مصرية اسمها هاجر.
 2 وكمال ساراي لأبرام: الله تعالى ما اعطاني الذرية. كقوم اصا اتكي امع هاجر. يكان الله تعالى يعطيني ذرية منها. وعدل أبرام
 3 والي كالتلو ساراي اعيالو.
 4 وكمال ساراي واعطاتو خادمها وعاشرها. وهذا اخلك عاكب ما قضاو 10 سنوات فارض كنعان.
 5 وعاشر أبرام هاجر وحملت منو . والين عرفت أنها حملت، عادت تحكر عريبتها ساراي.
 6 وفذا كالت ساراي لأبرام: الله تعالى يحاسبك اعلي ذا الي اخلكلي. عاكب ما اعطيتك خادمي وحملت منك، عادت تحكرني.
 7 الله تعالى يقضي بيني وبينك.
 8 وجاوبها أبرام وكمالو: هاذي خادمك كدامك وعدليلها الي اتدوري. وعذبت ساراي هاجر يلين هربت اعليها.
 9 واجبرها ملاك الله تعالى اكريب من ظاية الماء فطريك الي واعدة مدينة اسمها شور.
 10 وكمالو ملاك الله تعالى: يا هاجر يا خادم ساراي، من امنين جاية؟ وامنين واعدة؟ وكمالو هاجر: أنا هربت من عريبتني ساراي.
 11 وكمالو ملاك الله تعالى: رجعي شور عريبتك وسمعيها.
 12 وكمالو املي: لاهي انكثر نسلك يلين يعود ما يكد ينعده.
 13 وكمالو املي: انتي موجوعة ظرك ولاهي تبراى اعلي اطفيل، ولاهي اتسميه إسماعيل الي معناه الله تعالى يسمع. بيبي الله تعالى
 14 حس بألامك.

- 12 واطفيلك لاهي يعود آرا كچاج امتين وامعادي الناس كاملة والناس كاملة امعاديتو. ولاهي يعود آرا كچاج مستحرش ومتكبر اعلى اخوتو كاملين.
- 13 وحمدت هاجر الله تعالى اللي شافها وحس بالاماها وكالت: أنا شفت ظرك اللي يراعي فيّ .
- 14 ولذلك أسمات هاذي الحاسي باسم: حاسي الحى اللي يراعي فيّ. وهاذي الحاسي هي موجودة امبين قادش وبأرد.
- 15 وعاكب ذا خلات هاجر لأبرام ولو. وسما أبرام اطفيلو اللي من هاجر باسم إسماعيل.
- 16 وكان أبرام فذا الوقت عندو 86 سنة.

17

بركة النبي إبراهيم

مولانا يبارك النبي أبرام باسم اجديد هو إبراهيم

مولانا يعدل ازيانة هي علامة عهدو

- 1 والين عاد أبرام عندو 99 سنة اتجلاؤ الله تعالى وكالو: أنا هو مولانا القادر، امشي كدامي بطريك امسكمة.
- 2 لاهي انعدل عهدي امعاك وانكتر نسلك حته.
- 3 وكام أبرام واسجد كدام مولانا. واتكلم امعاه مولانا وكالو:
- 4 اراعيني لاهي انعدل عهدي امعاك ولاهي اتعود بو ياسر من لأمم.
- 5 ومن ظرك ما اتلا ينكالك أبرام اللي معاناه ابو لمعظم ، يغير لاهي ينكالك النبي إبراهيم اللي معناها بو ياسر من لأمم. ببلي لاهي انعدلك منك ياسر من الشعوب.
- 6 ولاهي اتعود آرا كچاج فايديتو ياسرة، ولاهي يتفرع من نسلك ياسر من الشعوب، ولاهي يوظو من نسلك ملوك.
- 7 ويعود عهدي إلى الأبد امبيني وبينك وبين نسلك عاكبك جيل اورا جيل. وانعودك إله ولنسلك من بعدك
- 8 ونعطيك اتنا وذريتك من بعدك ارض كنعان كاملة، اللي اسكنتها متغرب، لكم الدهر كاملو وانعود إلههم.
- 9 وكال مولانا للنبي إبراهيم: احفظ عهدي اتنا وذريتك من عاكبك مادامو حيين.
- 10 هاذا هو لعهد اللي امبيني وبينك وامبين ذريتك من بعدك اللي ياتكم تحفظوه: يُزَيِّنُ الذكور كاملين اللي عندكم .
- 11 اتزينو كل اذكوركم كاملين واتعود علامة لعهد اللي امبيني وامبينكم.
- 12 اتمزينو اذكوركم كاملين من بو 8 أيام اسوا من ذريتك وللا من ذرية حد مشري من فظتك ماهو من نسلك.
- 13 ياللة يُزَيِّنُ كل اطفيل اخلاكة فدارك وللا مشري بالفضة، واتعود علامة عهدي إلى الأبد فلعهدكم .
- 14 واذكر اللي فيكم ما أُزَيِّنُ ينصاع من دار أهلو ببلي خالف عهدي.
- 15 وكال مولانا للنبي إبراهيم: وساراي اعيالك لا تيت اتكولها ساراي من ظرك، يغير لاهي يعود اسمها سارة اللي معناها لأميرة.
- 16 ولاهي انباركها، ولاهي نعطيك اطفيل منها، ولاهي انباركها وانعدها أم لياسر من الشعوب. ومنها لاهي يوظ ملوك.
- 17 واسجد النبي إبراهيم واضحك وكال امبينو امع راصو: اثرو يصح يخلك اطفيل لراجل بو 100 سنة ؟ واثرو يصح تبرا سارة وهي أم 90 سنة ؟
- 18 وكال النبي إبراهيم لمولانا: وإسماعيل ياريتو يُحْظَرُ من بركتك .
- 19 وكالو مولانا: اللي لاهي تبرا هي سارة اعيالك، ولاهي يخلك منها اطفيل، واتسميه إسحاق. لاهي انعدل عهدي إلى الأبد امعاه وامع ذريتو من بعدو.

- 20 أما اصا إسماعيل فأستجبت لطلبتك لو. لاهي انباركو حته، ولاهي يعود فايدتو ياسرة، ولاهي انكثرتو نسلو، ولاهي يعود بو
لثاني عشر رئيس. ويعود شعب اكبير.
21 يغير عهدي لاهي يعود امع إسحاق اللي لاهي يجي من سارة كيف هاذا الوقت من السنة الجاية.
22 والين اوفانا من لكلام امع النبي إبراهيم امشا عنو.
23 وفذاك النهار اكبظ النبي إبراهيم ولو إسماعيل والذكور كاملين اللي خلطو فدارو والذكور كاملين اللي اشرا، وزيهم، وعدل
ذا اللي كآلو مولانا.
24 وكان النبي إبراهيم عندو 99 سنة وقت ازياتو.
25 وإسماعيل ولو وقت ازياتو عندو 13 سنة.
26 وتمت ازيانة النبي إبراهيم وإسماعيل
27 والذكور كاملين اللي خلطو فدارو واذكور كاملين اللي اشرا فنفس اليوم.

18

بركة النبي إبراهيم

النبي إبراهيم يتشفع لسدوم وعمورة

- 1 وعاكب ذاك اظهر الله تعالى للنبي إبراهيم عند صدرية ممرا، وقت اللي كان كاعد كدام فم خيمتو لپكايلا.
2 وفذا ركب وجهو وشاف اثلث رجالة ماشين اعلى جيتو، وادفع شورهم اياك يرحب بيهم. والين لحكهم، كأم واسجد اعلى
التراب إحترام لهم.
3 وكال: يا شيخني إلى عدت شايف عن عبدك يستحق الشرف عنك تستراح عندو، لا تتخطاه.
4 وخليني انجيب لكم شي من الماء تغسلو بيه كرعكم وتكعدو تحت ظل الصدرية.
5 وانجيب لكم شي من امبورو توكوه ومن فم تواصلو مشيكم واتعودو خظتو اعلى خيمة عبدكم. وكالولو: ما فم مشكلة، عدل ذا
الي كلت.
6 وادفع النبي إبراهيم واعد خيمتو اللي فيها سارة وكالها: كومي بالعجلة وعجني 3 كيلات اكار من الديكيط الزين وخزبيهم.
7 وكأم النبي إبراهيم وادفع شور امراحو واكبظ اعجل اسمين واعطاه لجديع عندو ينصبو.
8 وعاكب ذاك اكبظ النبي إبراهيم شي من الزبدة ولبن ولعجل اللي انطبخ، واطرح ذا كدامهم، واپكا واكف كدامهم يخدمهم
تحت الصدرية وهو ما يوكو.
9 وكالولو: ويني اعيلك؟ كآلم النبي إبراهيم: اراعيا فالخيمة.
10 وكال واحد منهم للنبي إبراهيم: لاهي نرجعلك فهاذا الوقت من السنة الجاية ولاهي اتعود سارة عادت باطفيها منك. وذا
الوقت كانت سارة واكفة اوراه عند فم الخيمة وسمعت اكلامهم.
11 وكان النبي إبراهيم وسارة اكهولة اكار فالسن واتخطات سارة سن الحمل.
12 وظحكت سارة امينها امع راصها وكالت: عاكب ما استكهلت وعاد راجلي شيباني نجبر العيال؟
13 فذا كآل الله تعالى للنبي إبراهيم: اشواسا سارة تضحك واتكول: انكذ نبرا اعلى اطفيل وآنا كهلة؟
14 الله تعالى اثرو يكلبو شي؟ لاهي نرجعلك فهاذا الوقت من السنة الجاية واتعود سارة عادت باطفيها منك.
15 وانخلعت سارة ونكرت اعلمها ظحكت. وكالها الله تعالى: ماهي حك انتي اضحكتي ايكال!
16 وعاكب ذاك كآمو الرجالة الثلاثة ماشين اعلى جية سدوم، وامشا امعاهم النبي إبراهيم يسيفتهم.
17 وكال الله تعالى اللي هو واحد من الرجالة الثلاثة: ما انكذ نوجد عن إبراهيم اللي ناوي انعدل لسدوم.
18 وإبراهيم لا بد من يعود بو شعب اكبير وامتين وتبارك شعوب لارض كاملة بسببو.

- 19 يبلي أنا هو اللي اخترتو اياك يوصي أولادو وأهلوه من بعدو اياك يحفظو الطريك الله تعالى، امعدلين البر والعدل يلين يعدل الله تعالى اللي اتعهد بيه للنبي إبراهيم.
- 20 وكمال الله تعالى: الخثرة الشكوى والظلم اعلى أهل سدوم وعمورة وشهرهم زاد اعلى حدو.
- 21 لاهي انكيسهم وانشوف إلى عاد ذا حك وبتأكد بنفسي.
- 22 وامشاو الرجالة اللي كانوا مع الله تعالى واعدين سدوم، وابكا النبي إبراهيم واكف مع الله تعالى.
- 23 وكرب النبي إبراهيم منو وكالو: لاهي تهلك الصالح مع الشرير؟
- 24 يلين تجبر فذي لمدينة 50 آر كاج صالحه لاهي تهلكها وللا لاهي اتساعها اعلى أساس هاذو الخمسين الصالحين؟
- 25 اتنا اعظم من اللي اتخلط امبين الصالح والشرير، ويعود الصالح كيف الشرير حشاك. ما يصح اعلنك اتنا الديان ما تعدل؟
- 26 وكمال الله تعالى للنبي إبراهيم: يلين نجبر فسدوم الا 50 آر كاج صالحه اتساع الباكين.
- 27 وكمال النبي إبراهيم: أنا كثر من لكلام مع الرب اعلى مخلوق من التراب والرماد.
- 28 وغفالتهم نقصو 5 اروا كيج صالحين لاهي تهلك لمدينة اعلى أساس 45؟ وكالو: يلين نجبر فيها 45 صالحين ما نهلكها.
- 29 وكالو النبي إبراهيم مرة ثانية: وغفالتك اجبرت الا 40 آر كاج صالحه؟ وكالو: ماني لاهي نهلكهم اعلى أساس 40 الصالحين.
- 30 وكمال النبي إبراهيم: لا تنفكع اعلى واسمجلي نتكلم، وغفالتك اجبرت الا 30 صالحين؟ وكالو: ماني لاهي نهلكها إلى اجبرت فيها 30 صالحين.
- 31 وكمال النبي إبراهيم: أنا نعرف اعلى كثر لكلام امعاك، يغير فغفالتك اجبرت الا 20 صالحين؟ وكالو: ماني لاهي نهلكها يلين نجبر فيها 20.
- 32 وكمال النبي إبراهيم: لا تغضب اعلى يا رب إلى اتكلمت وكفالتك إلى اجبرت فلهدينة الا 10 صالحين؟ وكالو: ماني لاهي نهلكها إلى اجبرت فيها 10.
- 33 وعاكب ما اوفاه الله تعالى من لكلام مع النبي إبراهيم، امشا وارجع النبي إبراهيم شور بلو.

19

بركة النبي إبراهيم

ول خو إبراهيم يسلك من أهل سدوم

- 1 وجاو الملائكة لأثنين لمدينة سدوم مع اغروب الشمس. وذا الوقت كان لوط كاعد احذا بوابة سدوم. والين شافهم كأم واكف واعدهم يستقبلهم، واسجد بوجهو اعلى التراب إحترام لهم.
- 2 وكال: يا شيوخي استراحو وباتو فدار عبدكم اياك اتقضو ليلتكم وتغسلو كرعكم، وامع الصباح اتواصلو اطريركم. وكالو: ابدي لاهي اتقضو ليلتنا لكدام.
- 3 يغير لوط الح اعليهم يلين يكلو يمشو امعاه وبياتو فدارو. وعشاهم واخبرهم امورو وكالو.
- 4 وسابك يركدو اجتمع اعليهم اكهولة وفكاريج مدينة سدوم كدام الدار.
- 5 وعيطو لوط وكالو: وين هوما الرجالة اللي بايتين عندك الليلة؟ وخظهم شورنا اياك انلوطوهم.
- 6 وخاظ شورهم لوط واكفل الباب اوراه
- 7 وكال: لا اتعدلو المعصية يا خوتي.
- 8 اراعي عندي منتين اعزيبات. لاهي انو خظهم لكم اياك اتعدلو امعاهم اللي تبغو. أما اصا ذو الرجالة لا اتعدلوهم شي ما ينفع ببلي ضيوف عندي.

- 9 وكالولو: الحز ابعيد عنا ! وكالو املي: ذا آر كاج الي جا يسكن عندنا عاد هامو يتحكم فينا. ظرك اصا لاهي انعدلوك شي أطم منهم هوما. واتكدمو واعدن لوط لاهي يدكدكو الباب.
- 10 فذا الرجالة اللي هوما خطار لوط مدو ايديهم وحكموه ودخلوه وسط الدار، وكفلو الباب.
- 11 وخبطو بلعما اروا كيج الي كانوا واكفين كدام الباب، اصغيرهم واكبيرهم، يلين عاد قابلهم يجبرو بل امنين الباب.
- 12 وكالو الرجالة لأثنين لوط: مندرا يكان عندك أقارب فلهدينة: انساب وللا أولاد وللا امنات وللا أي آر كاج اوخر اكريب منك؟ وخطهم من هادي لمدينة
- 13 بيبي لنا هاما اندرو هادي لبليدة بيبي كثرة الشكوى من شرها عند الله تعالى، وارسلنا اياك اندروها.
- 14 وامشا لوط يعلم الرجالة اللي كانوا لاهي يتخيمو امع امناتو وكالهم: كپومو الفولك واوخطو من هادي لبليدة بيبي الله تعالى لاهي يدمر هادي لمدينة. ولا جد اعليهم اكلامو.
- 15 والين عاد الفجر الحو الملائكة لأثنين اعلى لوط وكالولو: كپوم الفولك واكبط اعمالك وامناتك الي امعاك اياك ما تهلك بسبب اثم أهل لمدينة.
- 16 يغير يلين ابطا لوط حكمو الرجالة بايديه وايدن اعمالو وامناتو وامشاو بيهم شور كدام لمدينة بيبي الله تعالى اشفق اعليهم.
- 17 والين وخطوهم ابعيد كال واحد من الملائكة للوط: سلك روحك ولا اتخرص اوراك ولا توكف فذي لبليدة كاملة. اهرب اعلى جيمة لكدا اياك تسلك.
- 18 وكال لوط: لا اتواسلي ذاك يا شيخي،
- 19 اتنا اعرفتي شي واهتمت بي وسلكتني من الموت. يغير أنا ما انكد نلجا فلكما خايف من يخلطلي شي وانموت.
- 20 اراعي مدينة اكريب انكد نهرب شورها. وهي مدينة اصغيرة وخليني نلجا شورها. امالها مدينة اصغيرة حته؟ وانكد نسلك فيها بروحي؟
- 21 وكالو الملاك: أنا اچلت طلبك ولا ني لاهي اندمر ذي لمدينة الصغيرة.
- 22 اهرب شورها بالعجلة بيبي ما انكد انعدل شي لسدوم سابك توصل اتنا لهادي لمدينة الصغيرة. ولهذا السبب اسمت هادي لمدينة باسم صوغر الي معناها الصغيرة.
- 23 والين ظهرت الشمس اعلى لارض، الحك لوط صوغر.
- 24 وفذا امطر الله تعالى اعلى سدوم وعمورة كبريت ونار من السما.
- 25 واحرك الله تعالى ذيك لارض والي ساكنين فيها والوديان الي حذاها وكل ارضهم كاملة الي محروثة.
- 26 واتلفتت اعمال لوط الي كانت اوراه بيها اكييظ لقبه واتحولت شور اعمود من الملح .
- 27 وامشا النبي إبراهيم امع الصباح شور لبليدة الي وكف فيها كدام الله تعالى.
- 28 ونخرص اعلى جيمة سدوم وعمورة واعلى لارض الي امجاورتهم وشاف الدخان طالع اعلى شكل اعمود.
- 29 وعاكب ما دمر مولانا هادي لبليدة، ما انسا وعدو للنبي إبراهيم وخط لوط سابك يدمر لمدينة الي كان ساكن فيها.
- 30 وعاكب ما دمر مولانا سدوم وعمورة، امشا لوط وامناتو من صوغر، واسكنو فلكما بيبي كان خايف من السكن فصوغر.
- والجا هو وامناتو فامغارة فالكدية.
- 31 وكالت منتو لكبيرة نلختها الصغيرة: نحنا بونا يستكهل ولارض ما اتلاو فيها رجالة يتخيمو امعانا كيف الناس كاملة.
- 32 اتعالي اصا نسكوه شي من انخر وتكو امعا اياك ما تنقطع ذرية بونا.
- 33 واسكوا انخر لبوهم فذيك الليلة، وكامت المنت لكبيرة واتكات امعا . ولا حس لوط بتكيا امعا ولا ايكماها.
- 34 وفانهار الي اوراه كالت المنت لكبيرة نلختها الصغيرة: أنا اتكيت امع بوي البارح . وهاي نسكوه انخر هادي الليلة املي وتدخلي شورو انتي وتكيا امعا، ونجبرو من بونا ذرية.

- 35 واسكوا بوهم الخمر فذي الليلة الثانية وكامت المنت الصغيرة واتكات امعاه. ولا حس لوط بتكيها امعاه ولا ايكامها.
 36 وبهاذا السبب حملو امنات لوط من بوهم.
 37 وابرات المنت لكبيرة اعلى اطفيل سماتو مؤاب اللي معناه من بوي، وهو بو قبيلة المؤابين إلى اليوم.
 38 والمنت الصغيرة ابرات املي اعلى اطفيل وسماتو بن عمي اللي معناه ول أهلي، وهو بو قبيلة بني عمون إلى اليوم.

20

بركة النبي إبراهيم

مولانا يسلك اعيال النبي إبراهيم

النبي إبراهيم يصلي من أجل اسلاكة شيخ الفلشطييين

- 1 وارحل النبي إبراهيم من فم واعد ارض النقب اللي فالجنوب واسكن امين مدينة قادش ومدينة شور وقضا شي من الوقت فمدينة جزار.
 2 وفم كأل النبي إبراهيم عن سارة اعيالو: هاذي اختي. وارسل أيمالك ملك جزار امراسيل يجيبولو سارة.
 3 واتجلا مولانا لأيمالك فلم فالليل وكآلو: اتنا لاهي اتموت بسبب اعلتك اكيظت امرة متخيمة.
 4 يغير أيمالك لحكوا ذا مافات امسها وكأل لمولانا: لاهي تكلني وتكل أمة بريئة؟
 5 امالو كآلي اعلنها اختو وهي املي كآلتلي اعلنو خوها؟ ما عدلت ذا اللي عدلت يكون شاك اعلنو صالح ونيتي كانت زينة.
 6 وكآلو مولانا: آنا نعرف اعلتك نيتك كانت زينة، ولذاك امنعتك من اطيح فالمعصية واتمس سارة.
 7 ظرك اصا رجع للرجال اعيالو بيهي هو نبي، اياك يطلبك مولانا وتحياء. وإلى ما رجعتها اعرف اعلتك اتنا وذا اللي لك ميتين قطعاً.
 8 وبكر أيمالك امع الصباح وعيط لعبيدو كاملين، ورد اعلهم ذا اللي اخلق، وانخلعو كاملين خلعة امتينة.
 9 وعيط أيمالك للنبي إبراهيم وكآلو: اللي عدلتنا شنهو؟ شنهو اخطأ اللي عدلتك اياك اتجيبلي واتجيب لمملكتي هاذا الذنب لكبير؟ اتنا عدلتلي شي خاسر ما كان يالتك اتعدلولي.
 10 وسول أيمالك النبي إبراهيم: اشلاك اتعدل هاذا؟
 11 وكآلو النبي إبراهيم: آنا عدلت ذا اللي عدلت بيهي شكيت اعلن هاذي لبليدة ما فيها حد خايف من مولانا، وخفتكم تكلوني اعلى أساس اعيالي.
 12 وفلحقيقة هي اختي منت بوي ولا هي منت أمي واتعرست امعاه.
 13 والين ادعاني مولانا اياك تمشي عن دار بوي، بكلها: بل امنين تمشو كولي اعلي خوك واتعودي عدلتلي غاية اكبيرة.
 14 واكيظ أيمالك اغم وابكر واعبيد واخدم واعطاهم للنبي إبراهيم، ورجعلو سارة اعيالو.
 15 وكأل أيمالك: هاذي ارضي كدامك واسكن بل امنين تبغي فيها.
 16 وكأل لسارة: اراني اعطيت نخوك ألف كطعة من الفضة. انبرئك بيها من لاساءة كدام الناس اللي امعك، وانتي بريئة كدام كل واحد. وابهاذي الطريقة اتعود رجعتك كرامتك.
 17 واطلب النبي إبراهيم مولانا اياك يشفي أيمالك. وابرات اعيالو وخدمو
 18 بيهي مولانا ابلا اعيال وكل اخدم أيمالك بلعكار بسبب سارة اعيال النبي إبراهيم.

21

بركة النبي إبراهيم

مولانا يسلك النبي إسماعيل

النبي إبراهيم يعدل عهد سلام امع الفلشطييين

- 1 وعاكب هاذي لحداث انعم الله تعالى اعلى سارة واعطاها ذا اللي وعدھا بيه.
- 2 وحملت سارة وابرات اعلى اطفيل لإبراهيم فنفس الوقت اللي كط كآو مولانا. وكان النبي إبراهيم فذا الوقت مستكهل حته.
- 3 وكآم النبي إبراهيم وسما اطفيلو اللي اجبر من سارة إسحاق.
- 4 وكآم زينو فاليوم الثامن كيف ما اطلب مولانا.
- 5 ووقت اخلاكة إسحاق كان النبي إبراهيم عندو من لعمر 100 سنة.
- 6 وكآلت سارة: أنا ضحكني مولانا. وكل الناس اللي تسمع ذي اللي اخلك يضحكو هوما املي.
- 7 وكآلت سارة املي: من كان يكد يكدول للنبي إبراهيم اعلن سارة لاهي اترضع أولاد؟ وارايعني أنا ابريتلو اعلى اطفيل فاستكهيلو.
- 8 واكبر إسحاق وانفطم وعدل النبي إبراهيم وقت فظيم إسحاق ندوية اكبيرة.
- 9 وفواحد من انهارات شافت سارة اعلن إسماعيل ول هاجر المصرية يجوق فإسحاق.
- 10 وكآلت سارة للنبي إبراهيم: صوع هاذي الخادم هي وولها بيبي ول هاذي الخادم ماني كابلتو يورث امع ولي إسحاق.
- 11 ولا ازيان هاذا عند النبي إبراهيم اعلى أساس ولو إسماعيل.
- 12 وكآل مولانا للنبي إبراهيم: لا تنفكع من امردة الطفيل وأمه. واسمع لكلام سارة وعدل ذا اللي كآلتك بيبي من إسحاق اتعود لك ذرية.
- 13 ولاهي نجعل من ول الخادم املي أمة اكبيرة بيبي هو من ذريتك.
- 14 وانهار من غد كآم النبي إبراهيم امع الصباح واكيط شي من امبورو وكربة ماء واعطاهم لهاجر ودارهم اعلى اكآفها وصاعها هي امع اطفيلها. وكيمت ماشة وذهبت نخلوات بئر السبع.
- 15 والين افرق اعليها ماء لكربة، طرحت الطفيل تحت وحدة من الصدرايات.
- 16 وكعدت امكابل 100 متر كدامو بيبي كآلت: ما نبغي نخطر الموت اطفيلي. وكعدت تزكي وعادت تبكي.
- 17 واسمع مولانا بكي الطفيل، وفذا عيط ملاك مولانا لهاجر من السما وكآلها: انتي اشفاكعك يا هاجر؟ لا تخافي بيبي مولانا اسمع بكي الطفيل من لبيدة اللي فيها.
- 18 كومي ورفديه وضيه شورك. بيبي لاهي انعدلو أمة اكبيرة.
- 19 وافتح مولانا عينين هاجر ونعتلها حاسي من الماء. وامشات واملات لكربة واسكات الطفيل.
- 20 وكان مولانا امع الطفيل. والين اكبر إسماعيل، اسكن نخلوات فاران وعاد اخباري فارماية السهم.
- 21 وعرستو أمو امع امرة مصرية.
- 22 وفذا الوقت كآل أيمالك وقائد جيشو فيكول للنبي إبراهيم: نحنا لاحظنا اعلن مولانا امعك فكل شي اتعدلو،
- 23 واندورك طرك تحفلي اعلى مولانا اعلنك مانك لاهي تغدر بي ولا تغدر بنسلي ولا أولادي، واحلفلي اعلنك لاهي تعرف شي لشعي اللي اتغربت بينهم كيفما أنا احسنت اعليك.
- 24 وكآل النبي إبراهيم: راني حالفلك.
- 25 وعاتب النبي إبراهيم أيمالك اعلى أساس الحاسي اللي كبطوها اعبيد أيمالك بالقوة.
- 26 وكآل أيمالك: أنا ما نعرف من اكيط هاذا الحاسي، واتنا املي ما كآتلي من اكيطها. وأول مرة نسمع بذا هو اليوم.
- 27 وفذا اعطا النبي إبراهيم لأيمالك اغتم وابكر واكقطع كلهم امع لوخر عهد.
- 28 وعزل النبي إبراهيم اسبع انعاج من غنمو اعلى زر.

- 29 واكلو ايمالك: شهي الغاية من اعزيل هاذو اسبع انعاج وحدهم؟
 30 واكلو النبي ابراهيم: هاذو اسبع انعاج انكدها بين ايديك تشهد اعلي أنا هو اللي احفرت هاذي الحاسي.
 31 ولهذا السبب سما هاذي لبليدة بئر السبع اللي معناها حاسي الحلفة. بيبي ايمالك والنبي ابراهيم كل واحد منهم احلف فم.
 32 وبهاذي الطريقة كطعو لأثنين عهد اميناتهم فبئر السبع. ومن فم كأم ايمالك وفيكول قائد جيشو ورجعو شور ارض الفلشطييين.
 33 واغرس النبي ابراهيم نوع من الصدر كيف الكبات فبئر السبع وصلّى فم لله تعالى للإله اللي كان موجود سابك كل شي.
 34 واسكن النبي ابراهيم فارض الفلشطييين ياسر من الزمن.

22

بركة النبي ابراهيم

مولانا يبارك النبي ابراهيم اعلى أساس طاعتو للتضحية بولو إسحاق

- 1 وبعد يلين اسكن النبي ابراهيم فارض الفلشطييين، كأم مولانا وأمتحن النبي ابراهيم وعيطلو: يا ابراهيم! واكل النبي ابراهيم: اراعيني يا مولانا.
 2 واكل مولانا للنبي ابراهيم: اكبظ ولك إسحاق اللي امعاك والي تبغي، وامشي شور ارض المريا، وذبحو فم، وحركو، وكدمو كيفت قربان اعلى وحدة من ذوك لكدا اللي لاهي انعتك.
 3 وانهار من غد اوعا النبي ابراهيم امع الصباح واحزم اعلى احمارو، وامشا امعاه باثنين من اعبيدو وامعاهم ولو إسحاق، وجهز لحطب اياك يحرك اعليه القربان، وامشا اعلى جبهة لبليدة اللي كاكلو مولانا.
 4 وانهار الثالث ركب النبي ابراهيم وجهو وشاف لبليدة اللي كاكلو مولانا من اعبيد.
 5 واكل النبي ابراهيم للعبيد اللي امعاه: ابكاو هون امع لحمار اياك نمشي أنا امع الطفيل وانصلو لمولانا، ومن فم نرجعولكم.
 6 وكأم النبي ابراهيم ورفد إسحاق لحطب، وارفد النبي ابراهيم مشعل النار والموس، وامشاو فبلد.
 7 واكل إسحاق لبوه النبي ابراهيم: يا بوي! واكلو النبي ابراهيم: اراعيني يا ولي. واكلو: وينو لخروف اللي لاهي يخرك كيفت قربان؟ بيبي إسحاق شاف النبي ابراهيم عندو النار والموس يغير ما شاف لخروف.
 8 واكل النبي ابراهيم لإسحاق: مولانا لاهي يدبر لخروف اللي لاهي يخرك كيفت قربان، لا يشطنك شي. وواصلو مشيهم فبلد.
 9 والين لحكو لبليدة اللي كأل مولانا للنبي ابراهيم، كأم النبي ابراهيم وابنا فم مذبح، واجمع لحطب، وكثف النبي ابراهيم ولو إسحاق ودارو فولك المذبح فولك لحطب.
 10 ومد النبي ابراهيم ايده واكبظ الموس اياك يذبح ولو إسحاق.
 11 وفذا عيطلو ملاك الله تعالى من السما: ابراهيم ابراهيم! واكل النبي ابراهيم للملاك: اراعيني.
 12 واكل الملاك للنبي ابراهيم: لا اتركب ايديك اعلى الطفيل، ولا اتعدلو أي شي. أنا ظرك اعرفت اعلتك خايف من مولانا، ولا ابخلت ابولك الوحيد اعلى مولانا.
 13 وخرص النبي ابراهيم اوراه وشاف كبش متعلق باعراش الصدر. وكأم كاسو وجابو وذبحو وحركو القربان بل ولو.
 14 وسما النبي ابراهيم ذيك لبليدة باسم يهوه يراه اللي معناه الله تعالى يدبر. ولهذا السبب ينكال اليوم: فكدية الله تعالى يدبر.
 15 وعيط ملاك الله تعالى للنبي ابراهيم من السما مرة اخرا
 16 واكل: راعيني نحلفك بيكلي عدلت ذا اللي اطلبت منك ولا احكمت عني ولك الوحيد.
 17 لذك لاهي انباركك وانكثر ذريتك ويعود عددهم كيفت النجوم السما وكيفت احصي التراب لبحر، ولاهي تورث ذريتك مدن اعدادها.

- 18 وبذريتك تبارك جميع أمم لارض بيك اللي اسمعتلي.
 19 وعاكب ذاك ارجع النبي إبراهيم شور اعيدو لأثنين ورجعو كاملين شور بئر السبع بل امنين ساكن النبي إبراهيم.
 20 وانپال للنبي إبراهيم عاكب يلين خلپكت هاذو لمور: اراعيا ملكة خلپكولها أولاد لخور ناخور:
 21 عوصا هو لبكر وخوه بوزا وقوئيل بو أرام
 22 وكاسد وحزوا وفلداش ويدلاف وبتوئيل .
 23 واخلك لبوتوئيل رفقة. هاذو الثمانية خلاتهم ملكة لناخور خو النبي إبراهيم.
 24 واملي خلاتلو خادمو اللي اسمها رؤومة: طابح وجاحم وتاحش ومعكة.

23

بركة النبي إبراهيم

- النبي إبراهيم يشرف من خلال الشعوب الي احذاه وقت موت اعيالو
 1 وعاشت سارة 127 سنة من لعمر.
 2 وماتت فقريه حبرون فارض كنعان. وجا النبي إبراهيم امتكدر اياك ينوح اعلى سارة.
 3 والين كدام النبي إبراهيم من كدام جثمان سارة كمال للحيتين:
 4 أنا خاطر وضيعف عندكم وطالكم تعطوني اقبر ندفن فيه اعيالي اللي ماتت.
 5 وكالولو الحيتين:
 6 اسمع يا شيخنا اتنا مولانا عدلك زعيم بينا، اكبظ ندفن اعيالك فازين اقبورنا، ما فينا حد لاهي يحكمك عن ندفن اعيالك فقبرو.
 7 وكدام النبي إبراهيم اركع كدام الحيتين أهل لبلاد يشكرهم.
 8 وكالهم النبي إبراهيم: إلى عدتو تبغوني اصا ندفن اعيالي، فاسمعوني واتوسطولي فعفرون ول صوحر
 9 اياك يبيعلي امغارة المكفيلة اللي يملك والي اعلى زر احريثو، ويبيعهالي بسعرا كامل اياك انعدلها مدفني.
 10 وفذا الوقت كان عفرون الحيثي كاعد امع اجماعتو وكال للنبي إبراهيم كدام كل الحيتين اللي اجتمعو عند بوابة لمدينة:
 11 لا يا شيخني اسمعني، لاهي نعطيك احريثي ولمغارة اللي فيه هدية مني لك. وشعبي شاهد اعلى ذا، وادفن فيها اعيالك.
 12 واركع النبي إبراهيم يشكر الحيتين مرة اخرا.
 13 وكال النبي إبراهيم لعفرون كدام الحيتين: حپكلا اسمعني، أنا نبغي ندفن صوك لحرثة واپكل مني هاذا اياك انكك ندفن اعيالي فيه.
 14 وجاوبو عفرون وكالو:
 15 اسمعني يا شيخني، هاذي لارض قيمتها 5 كيلوات من الفضة، وهاذا المبلغ بلا قيمة بيني وبينك، وادفن اعيالك.
 16 واپكل النبي إبراهيم لمبلغ اللي اعرض اعليه عفرون واوزن النبي إبراهيم لعفرون 5 كيلوات من الفضة كدام الحيتين حسب الوزنة اللي متعارف اعليها عند تجارهم.
 17 وصبحت احريثة عفرون اللي فالمكفيلة اللي اكريب من ممرا ولمغارة اللي فيها وكل الصدر اللي لحرثة
 18 للنبي إبراهيم وهاذا اشهد اعليه كل الحيتين اللي اجتمعو عند بوابة لمدينة.
 19 وعاكب ذاك كدام النبي إبراهيم وادفن اعيالو سارة فامغارة المكفيلة اكريب من ممرا اللي هي حبرون فابلا كنعان.
 20 واملك النبي إبراهيم من الحيتين لحرثة ولمغارة اللي فيها وعادو مدفونو.

24

بركة النبي إبراهيم

اعيال إسحاق أباركت بسبب أهلها اياك تجبر ياسر من الذرية

- 1 وعاكب فترة من الزمن استكهل النبي إبراهيم حته وباركو الله تعالى فكل شي.
- 2 وكال النبي إبراهيم لشيخ ابيدو والي هو مسؤول عن كل شي فدار النبي إبراهيم: دير ايدك تحت كاييتي،
- 3 واحلفلي اعلى الله تعالى إله السما ولارض اعلنك ما اتعرس لولي أي امرة من أهل كنعان اللي أنا عايش اميناتهم.
- 4 وتمشي شور بلدي ونفطي وتكبظ امرة منهم لولي إسحاق.
- 5 وكال لعبد للنبي إبراهيم: وإلى عادت لمرة اللي لاهي نكبظ لإسحاق ما تبغي تمشي شور هادي لارض ، وفذي الحالة مندرا يكانك تبغيني انجيب إسحاق للبلدة اللي اتتا جاي منها؟
- 6 وكالو النبي إبراهيم: عسك من اترجع ولي لقم.
- 7 الله تعالى إله السما اللي اكبطني من دار بوي ومن وطني وتكلم امعاي واحلفلي وكالّي: اندور نعطي هادي لارض لنسلك. يدور يمشي كدامك ملاك اياك تكبظ امرة لولي من ارض أهلي.
- 8 وإلين ترفض لمرة تمشي امعاك، اتعود اتنا فهادي الحالة عدلت اللي احلفتلي اعليه. يغير لا اترجع ولي لذيك لارض.
- 9 ودار لعبد ايدو تحت كايمة النبي إبراهيم واحلف لشيخو اعلنو لاهي يعدل ذا اللي احلفلو اعليه.
- 10 واكبظ لعبد 10 اجمال من حيوان النبي إبراهيم ورفد اجمال من كل الخير اللي عند شيخو. وامشا واعد أرام النهرين لبلدة اللي فيها ناحور.
- 11 وإلين يكرّب، برك اجمال خارج لمدينة احذا حاسي من الماء. وكان هاذا امع مغرب الشمس، وذا كان وقت وخيظ لعليات اياك يوردو فالحاسي.
- 12 واطلب لعبد وكال: يا الله تعالى إله شيخني النبي إبراهيم، يسرلي امري اليوم واحسن اعلى شيخني النبي إبراهيم .
- 13 أنا اراعيني واكف عند الحاسي ولعليات هادي لمدينة لاهي يوخظو يوردو.
- 14 ولمرة اللي انكولها: نزلي كدرتك اياك نشرب، وتسكيني وتسكيني اجمالي، اتعود هي لمرة اللي اخترت لعبدك إسحاق. وبهادي الطريقة اتعود اعرفت اعلنك احسنت اعلى شيخني النبي إبراهيم.
- 15 وسابك يوفي عبد النبي إبراهيم دعاؤو، جات رفقة منت بتؤئيل ول ملكة اعيال ناحور خو النبي إبراهيم وكدرتها اعلى اكتفها.
- 16 وكانت اشوية ازوية حته واعزبية ما كبط مسها راجل. وكاست ظاية الماء واملات كدرتها وكيمت ماشة.
- 17 وادفع عبد النبي إبراهيم شورها وكالها: اسكيني اشوي من الماء من كدرتك.
- 18 وكالتلو رفقة: اشرب يا شيخني ونزلت كدرتها بالعجلة اعلى ايديها واسكاتو.
- 19 وعاكب يلين اسكاتو كالتلو: لاهي انجيب املي الماء لاجمالك اياك نسكيمهم.
- 20 وصبت كدرتها بالعجلة فحوظ الماء ودفعت شور حاسي وتورد الماء يلين اسكات اجمالو كاملين.
- 21 وكان عبد النبي إبراهيم امراقبها فذا كامل اللي اتعدل من دون كلام اياك يعرف يكانها هي اللي اختار الله تعالى لإسحاق وللا ابدى.
- 22 وإلين شربت اجمال، اكبظ لعبد ووخظ حزمة من الذهب وزنها اكريب من 6 اكرامات ووخظ املي أسوارين من الذهب وزنهم 120 اكرام.
- 23 وسول لعبد رفقة وكالها: انتي منت من؟ كويلي مندرا يكانا انكدو نجبرو ابليدة انباتو فيها فدار بوك؟
- 24 وكالتلو رفقة: أنا بوي هو بتؤئيل ول ملكة وناحور.
- 25 وكالتلو املي: عندنا لحشيش وياسر من لعلف وعندنا املي بل امنين اتباتو فيه.
- 26 وفذا اركع واسجد لعبد لله تعالى يشكرو.

- 27 وكال: اتبارك الله تعالى إله شيوخي النبي إبراهيم اللي ما امنع كرمه ونزاهته عن النبي إبراهيم. وكال لعبد: الله تعالى سهداني اعلى دار اخوت شيوخي النبي إبراهيم.
- 28 ودفعت رفقة شور دار أمها وردت اعليها اللي اخلك.
- 29 وكان عند رفقة خو ينكالو لابان. وكام لابان وامشا واخذ شور لعبد اللي عند الظاية
- 30 بيبي فات شاف حزمة الذهب وأسوارين فايدين اختو رفقة، واسمع املي اكلام رفقة عن لعبد اللي اجبرت، واجبر لابان لعبد واكف احذا اجمالو اكريب من الظاية.
- 31 وكال لابان للعبد: اتفضل اتنا امباركك الله تعالى. اعلاش اتنا واكف الكدام؟ آنا جهزت الدار و جهزت املي ابليدة يستراحو فيها اجمالك.
- 32 وكاس لعبد الدار وانزل لابان وعبيدو اللي كانو رافدين اجمالو واعطاو لاجمال لعبد لحشيش ولعلف، وجابولو شي من الماء هو والي كان امعاه اياك يغسلو پكرعيم.
- 33 وطرحو كدامو اطعام اياك يوكل، يغير سابك يوكل كال: ماني لاهي نوكل سابك ما پكلمك اللي عندي. وكال لابان لعبد النبي إبراهيم: اتفضل كپول اللي عندك.
- 34 وكال للابان: آنا عبد للنبي إبراهيم.
- 35 والله تعالى بارك حته شيوخي النبي إبراهيم وعاد زعيم. والله تعالى اعطاه لغنم وليكر والفضة والذهب ولعبيد ولخدم والبل ولحمير.
- 36 وخلاتو سارة اطفيل عاكب ما استكهلت واعطاه بوه النبي إبراهيم كل أملاكو.
- 37 واحلفلي شيوخي النبي إبراهيم وكالي: لا اتعرس لولي إسحاق أي امرة من الكنعانيين اللي آنا ساكن فبلادهم.
- 38 وكالي: كپيس أهل بوي وعائلي واكبظ امرة لولي.
- 39 وكلت لشيوخي النبي إبراهيم: وفالة لمرة اللي لاهي نجبر ابات تمشي امعاي شور كنعان؟
- 40 وكالي النبي إبراهيم: الله تعالى اللي امشيت آنا اعلى اطريكو يدور يمشي ملاكو ويوفقتك فهمتلك اياك تكبظ اعيال لولي إسحاق من عائلي ومن أهل بوي.
- 41 وكالي شيوخي النبي إبراهيم: وإلى جيت لأهلي ورفضو يعطوهالك، فهاذي الحالة نطلصك من الحلفة اللي احلفتي اعليها.
- 42 وكپست اليوم الحاسي وإين الحكمتها اطلبت الله تعالى ويكلو: يا الله تعالى إله شيوخي النبي إبراهيم، آنا طالبك اتوقفني فاللي اعلى أساسو آنا سافرت.
- 43 آنا اراعيني واكف كدام الحاسي. اندورك تجعل الشوية اللي لاهي اتجي اياك تورد الماء واللي يلين نطلب منها: تسكيني من الماء،
- 44 واتكولي: اشرب اتنا وآنا لاهي نسكي اجمالك املي. اتعود هي الشوية اللي اختارها الله تعالى لإسحاق ول شيوخي.
- 45 والوقت اللي كنت نطلب فيه مولانا وانا جي فيه نفسي، فذا شفت رفقة جاية ورافدة كدرة اعلى اكافها، وكپست الحاسي تورد الماء ويكلها: طالبك تسكيني.
- 46 ودفعت وطرحت كدرتها وكاتي: اشرب اتنا ولاهي نسكي املي اجمالك.
- 47 وسولتها: منت من انتي؟ وكاتي اعلنها منت بتؤئيل ول ناحور اللي خلاتو ملكة. واكبظت ودرت الخاتم فاخافرها والسوار فايديها.
- 48 وبكمت واسبجت وباركت الله تعالى إله شيوخي النبي إبراهيم اللي سهداني شور الطريك لمسكمة اياك نكبظ منت خو النبي إبراهيم لولو إسحاق.
- 49 وظرك كپولوي إلى عدتو لاهي اتعدلو ذي الغاية لشيوخي النبي إبراهيم، وللا طلصوني وخلوني انكيم واعد ابليدة اخرا.
- 50 وكالولو لابان هو وبتؤئيل: ذي لمردة جات من عند الله تعالى ونحنا ما انكدو انكولوك اهيه وللا ابدى.

- 51 رفقة اراعيا كدامك. اكبظها وامشي بيها اياك اتعود اعيال لأول شيخك النبي إبراهيم كيف مراد الله تعالى.
- 52 وإلن اسمع عبد النبي إبراهيم اكلامهم، ابرك اعلى التراب ساجد لله تعالى.
- 53 ووظخ لعبد اديار من الفضة والذهب ولباس واعطاهم لرفقة واعطا املي نخوها وأما هدايا غالية.
- 54 وكال واشرب هو ورجالتو وباتو ليلتهم فم. وإلن اوعاو امع الصبح كآلهم: اعطوني اطريك اياك نرجع شور شيخي النبي إبراهيم.
- 55 وكالولو خو رفقة وأما: خلي رفقة تبيكي امعانا 10 أيام ولا ذاك ومن فم تمشي.
- 56 وكآلهم لعبد: لا تحصروني ، الله تعالى سبكي اطريكي ، خلوني نمشي شور شيخي النبي إبراهيم.
- 57 وكالولو: لاهي انعطو لرفقة وانسلوها عن رأيها.
- 58 وعطو لرفقة وسولوها: تبغي تمشي امع ذا الرجل؟ وكآلتهم: اهيه نبغي نمشي.
- 59 وخلاو رفقة تمشي وامعات امرطعتها وعبد النبي إبراهيم ورجالتو.
- 60 وباركو رفقة وكالوها: اعليك بركة مولانا. انتي ختنا عدلي ياسر من الذرية اياك اتعود آلاف مؤلفة وتورث ذريتك مدن اعدائها.
- 61 وكآمت رفقة واخدمها وركبو اجمال وامشاو اورا عبد النبي إبراهيم. وكيم لعبد برفقة ماشي بيها.
- 62 وفذاك الوقت كان إسحاق الي ساكن فالنقب ارجع من الطريك الي ينكأها حاسي الحي الي يراعي في.
- 63 وفدحميساية امشا واعد انخلوات اياك يتخمم . فذا شاف اجمال جاية .
- 64 ورفعت رفقة هي املي عينها وشافت إسحاق، وتبكرت عن اجمالها.
- 65 وسولت عبد النبي إبراهيم وكآتلو: منو هذا الرجل الي ماشي فالحرث اياك يتكألنا؟ وكألها لعبد: هذا شيخي إسحاق. وكبظت حولها واتحجبت عنو.
- 66 وعاكب ذاك رد لعبد اعلى إسحاق ذا كامل الي اخلك.
- 67 ودخل إسحاق رفقة شور خيمة أمو سارة واتعرس امعها وابغاها حتته واتعزا بيها عاكب موت أمو سارة.

25

بركة النبي إبراهيم

- عاكب موت النبي إبراهيم بركتو اتكيس ولو إسحاق
- 1 وعاكب ذا كآم النبي إبراهيم واتعرس امع امرة اسمها قطورة.
- 2 وخلاتو زمران ويقشان ومدان ومديان ويشباق وشوحا.
- 3 وخلا يقشان شبا ودادان ، وأولاد دادان هوما الأشوريم وللطوشيم ولأميم.
- 4 وأولاد مديان هوما عيفة وعفر وحنوك وأبيداع والأدعة ، وهادو كاملين جاين من ذرية قطورة.
- 5 وورث النبي إبراهيم للنبي إسحاق كل أملاكو.
- 6 واعطا لولادو من خدمو هدايا وقت محدو كان حي، وارسلهم اعلى جبهة الشرق ابعيد عن ولو إسحاق.
- 7 وعاش النبي إبراهيم 175 سنة.
- 8 ومات النبي إبراهيم بشيية سالحة وانضم إلى اسلافو.
- 9 ودفنو إسحاق وإسماعيل بوهم النبي إبراهيم فامغارة المكفيلة فحرث عفرون ول صوحر الحيثي الي احذا ممرا.
- 10 وهو الحرث الي كط اشرا النبي إبراهيم من الحيثيين وفيه اندفنو سارة والنبي إبراهيم فزر بعض.
- 11 وعاكب موت النبي إبراهيم بارك مولانا إسحاق ولو واسكن إسحاق عند الحاسي الحي الي يراعي في.
- 12 وهادو سبج أولاد إسماعيل ول النبي إبراهيم الي خلاتو هاجر المصرية خادم سارة لإبراهيم.

- 13 وهاذي أسامي أولاد إسماعيل مرتبة حسب اخلاقتهم: نايوت هو بكر إسماعيل وقيدار وأدبئيل ومبسام
14 ومشماع ودومة ومسا
15 وحدار وتيماء ويطور ونافيش وقدمه.
16 وهاذو هوما أسامي أولاد إسماعيل وعادو الشيوخ للثاني عشر قبيلة فبليدات مختلفة.
17 وعاش إسماعيل 137 سنة ومات وانضم شور اسلافو.
18 واسكن نسلو فبليدة الي امين حويلة وشور اعلى حدود مصر اعلى الزر الشرقي من مدينة أشور، وكانو اعلى عداوة امع أولاد
عمهم.
19 وهاذا سبج أولاد النبي إسحاق: إبراهيم خلا إسحاق،
20 وكان النبي إسحاق عندو 40 سنة فالوقت الي اتعرس فيه امع رفقة منت بتؤليل لأرامي الي جاي من واد آرام، وكانت خت
لابان لأرامي.
21 وكانت رفقة اعيال النبي إسحاق عاكر. وكام النبي إسحاق واطلبها الله تعالى اياك تجبر الذرية. واستجابلو الله تعالى وحملت
رفقة.
22 وادا يكو أولادها وهوما مزالو فكرشها، وفذا كالت رفقة: اعلاش يخلكي ذا؟ وامشات رفقة اتصلي واتسول الله تعالى عن
السبب.
23 وكالها الله تعالى:
فكرشك أمتين ويتفاركو من هاذو لأمتين شعبين ، واحد منهم يكلب لوخر ، وولك لكبير يستعبدو والصغير.
24 والين الحلق وقت بريها ابرات رفقة اعلى اتواما.
25 واخلاق لأول احمر واملان من ازغب. وسماوه عيسو الي معناه لمزغب.
26 وعاكب اشواي اخلك خوه، وهو كارد اكراع عيسو. وسماوه يعقوب الي معناه لمخادع . ووقت اخلاقتهم كان النبي إسحاق
عندو 60 سنة.
27 وكبرو التركة وكان عيسو اخباري فالصيد ويبغي الخلوات. ويعقوب كان عكسو بارد ويبغي لكعاد فالخيام.
28 وكان عيسو هو لمفضل عند النبي إسحاق بيبي يجبلو من صيدو. وكانت رفقة غالي اعليها يعقوب.
29 وفيوم من لأيام يلين ارجع عيسو من الخلوات فتران، اجبر يعقوب انصب اطعام زين.
30 وكال عيسو ليعقوب: غديني من ذا الطعام لحر. آنا ميت بيّ الجوع. ولهاذا السبب عيسو أسماً أدوم الي معناها لحر كيف
الطعام الي كال .
31 وكال يعقوب لعيسو: لاهي انغديك بشرط اعلك اتبعلي بكوريتك .
32 وكال عيسو ليعقوب: اعلى ذي الحالة آنا لاهي نعكب اتموت بالتالي شني الفائدة من بكوريتي؟
33 وكالو يعقوب: احلفلي ظرك . واحلفلو عيسو وبهاذي الطريقة باع عيسو بكوريتو ليعقوب.
34 واعطا يعقوب لعيسو شي من امبورو ولعدس وكال عيسو واشرب وكيم ماشي. وبهاذي الطريقة احتقر عيسو فائدة لبكورية.